





Warnunge
D. Martini Lu-
ther / An seine
lieben Deud-
schen.

Wittenberg.

1531.

14

5.

82
bel
M
Bib
N

Abb. 4^a (14)

Wittenberg

L. 19.



Handwritten text, likely a title or list, appearing as bleed-through from the reverse side of the page. The text is faint and difficult to decipher but appears to include several lines of text.

2
2
2
2



5.
82
bel
Me
Sicht
N

Warnunge S. Martini

Luther / An seine Lieben
Deutschen.



Ich hab an die geistlichen
auff diesem Reichstage zu Augspurg/
mein vleissig vnd trewes vermanen las-
ssen offentlich ausgehen / Vnd auff's
höhest gebeten / das sie ja nicht den
Reichstag / da alle wellt so hertzlich
auff hoffet vnd gasset mit grossen sehnen / solten on
ende zurgehen lassen / Sondern dahin handeln / das
friede gemacht / etliche ire grewel geendert vnd dem
Euangelio raum gegeben würde / Welchs ich auch /
mit meinem gebet / fur Gott / aus allen krefftten ge-
sucht vnd gesüßtzet habe / sampt allen frumen Chris-
sten. Das aber weder vnser vleissig gebet / gegen
Gott / noch vnser trew vermanung an sie / etwas ge-
holffen hat / ist leichtlich zu rechen / was es bedeut-
nemlich / das sie Gott / als die verstockten vnd ver-
blendten / welche so viel vnschuldigs blut / Gottes les-
sterung vnd grewlichs vnbusfertiges leben / drückt /
nicht werd hellt / das er jnen einen guten gedancken
odder süßtzen eingebe / odder das sie einigem wort
heilsamer vnd friedlicher vermanung / gehorchen /
Vnd stehet mit jnen / wie es zur zeit Jeremie stund /
mit den Juden / Da Gott zu im sprach / Jeremie. xv.
Vnd wenn gleich Mose vnd Samuel fur mir stün-
den /

A ij den /

den/so hab ich doch kein hertz zu diesem volck/Tret
be sie nur weg von mir/vnd las sie faren / Vnd Jeres
mie.vij. Vnd du solt nicht fur dis volck bitten/weder
Klagen noch flehen fur sie/auch sie nicht vertreten/
Denn ich wil dich nicht hören.

2
2
2
2

Solchs antwort mus ich vnd die meinen/vns
stzt auch lassen gelten vnd gesagt sein/vnd bisher ver
geblich fur die geistlichen gebeten haben / Weil Gott
mit der that gewaltiglich zeuget / das er vns fur sie
nicht erhören wolle / sondern sie lassen gehen vnd
sich/wie Pharao/jnn den heiligen geist versundigen/
bis das weder busse noch besserung zu hoffen sey/
Denn solt etwas mit beten fur Gott zur heben/vnd
bey den geistlichen / mit vermanen / flehen/demut/
gedult/erbieten/warheit/recht/guten sachen zc. et
was zur langen gewesen sein/so solts gewislich itzt auff
dem Reichstage zur langen gewesen sein / So ernste
lich (das weis ich) ist von den Christen gebettet/vnd
so hohe demut / gedult vnd flehen/ist da beweiseit/
vnd so gute rechte sache haben sie fur inen gehabt.
Nu sie aber den Reichstag nicht allein on ende vnd
friede haben lassen zugehen / sondern vnfriede ge
sterckt/vnd mit dreyen vnd trotzen beschlossen/So
wil ich sampt den meinen vnser gebet/nach Gottes
befelh/auch einzihen/vnd wie Sanct Johannes le
ret / fur die sunde zum tode / nicht beten / Sondern
dem verstockten Pharao zu sehen/wie in Gott im ro
ten meer teuffen wird / Denn vnser gebet vnd flehen
vmb fried/obs bey den verstockten verloren ist / So
wirds vns doch deste stercker helffen / vnd hat bereit
an/auch zu Augspurg/gros wunder gnug gethan/
Vnd

5.
Und sol auch mit Gottes gnaden durch dringen bis
ans ende / Denn wir sind doch erhöret vnd müssen er-
höret sein / das hat vns bisher nicht gefeilet / Sol vns
auch noch nicht feilen / Das weis ich für war / Amen.
Und sol gehen nach dem spruch Christi / Wenn der
Apostel grus vnd friede etwa inn einem hause nicht
stat noch friedes kinder fand / so solt sich jr friede wid-
der zu in lencken. Also auch hie / weil die geistlichen
weder gebet noch frieden achten / Sollen beide gebet
vnd frieden drumb vnuerloren sein / sondern zu vns
widder keren / vnd den geistlichen / an stat des gebets /
eitel flüche / vnd an stat des friedes / eitel vnfrieden /
vnd beides die fülle zu komen / Amen.

Darumb weil jr furnemen schlecht vnd steiff ste-
het auff der gewalt / vnd setzen ire sache auff die
faust / widder die offentliche vnd bekandte warheit
Gottes / So sol sich niemand für in fürchten / vnd sey
nur jederman getrost vnd vnerschrocken / widder sol-
che wütige Gottes feinde. Denn sie ruffen vnd beten
zu Gott nicht / können auch nicht beten / für bösem
Gewissen vnd sachen / faren einher aus hohmut vnd
trotz auff fleisch vnd blut / vnd dürffen schlecht kei-
nes Gottes dazu / Ja dürffen in auch nicht drumb
fragen / ob er das haben wolle / was sie dencken / Da
selbst hat denn Gott grosse lust vnd liebe zu / vnd lesst
im solchen trotz vnd seiner gnade verachtung / seer
wol gefallen / pflegt auch gros glück vnd sieg zu sol-
chem trotz vnd vermessenheit zu geben / das beide
Nos vnd man im roten meer ligt / vnd alles vber vnd
vber gehet / bis nicht einer vber bleibt. Wir aber gantz
sicher sind / das jr wütiges furnemen / nicht inn irer
A. iij macht/

macht/sondern inn Gottes hand stehet/vnd sie noch nicht so bald haben/was sie wollen / Er wird auch wollen ein Herr vber sie sein / wie noch bisher jmer geschehen/ das sollen sie wol erfahren / So wil ichs doch itzt dahin setzen/als sey kein Gott/vnd als im trawm vergeblich dencken/das jr gedancken vnd furnemen/angehen vnd fort faren werden mit gewalt.

Wenns nu auff's aller ergest gerett/So mus der zweier eins geschehen / Ein Krieg odder Auffrur/ Villeicht alle beide zu gleich / Denn es stehet wol drauff (wir reden itzt im trawm / da kein Gott ist) wo sie mit Krieg anfahen / das sich etwa ein fenlin auff werffe/vnd rotte sich ein hauffen zu samen/auch vnter irem eigen volck / das beide sie selbs vnd wir auch mit zu grund gehen/Denn sie dürffen sich inn solchem fall auff vnser lere nicht lassen/als seien sie nu gewis/das sich niemand widder sie setzen werde/weil wir widder die auffrur hart geschriben vnd geleret haben / man solle auch der Tyrannen freuel leiden/vnd sich nicht wehren/Wol ist's geleret/Aber die thetter kan ich nicht schaffen / Sintemal auch alle ander stücke vnser lere / wenig halten vnd achten/Würde nu der hauffe/vnser lere widder die auffrur von vns geleret/auch nicht halten / sonderlich / weil ihener freuel vnd mutwilliger Krieg/so vnleidliche vrsach dazu gebe/so würde sie der Teufel weidlich beschmeissen / vnd sie gar hübsch vnd lecherlich einen blossen legen/Ich rede itzt jmer im trawm / Aber sie mügen zu sehen / das der trawm nicht war werde/ Der trawm schadet mir nicht/ Trifft er sie/So haben sie es.

Wolan/

Wolan/Es gerate gleich/wie gesagt/zum Krieg
odder zur Aufffur (ob Gottes zorn ja fort gehen mü-
ste / als ich sorgen mus) So wil ich hie mit dieser
schriff/fur Gott vnd aller welt bezeuget haben/das
wir./ so die Lutherischen gescholten werden/keinem
rat vnd willen/ja auch keine vrsachen dazu gegeben/
Sondern alle wege vnd on auffhören/vmb friede ge-
beten vnd geruffen haben / Vnd die Papisten selbs/
wissen vnd müssen bekennen/das wir bis her friede
geleret vnd auch gehalten haben/vnd itzt auff dem
Reichstage auffshöhest begeret/Derhalben/wo ein
Krieg odder aufffur angehet/man ja nicht sagen mag
noch kan/Sihe/das ist die frucht der Lutherischen
lere/Sondern man wird sagen müssen/Sihe/das ist
der Papisten lere vnd frucht/die haben nicht wollen
friede/weder fur sich haben noch bey andern leiden/
Denn wir haben ja bis her in der stille geleret vnd
gelebet/kein schwerd gezuckt / niemand verbrennet/
gemordet/beraubt/wie doch sie bis her gethan vnd
noch thun/sondern haben jr morden vnd rauben/to-
ben vnd wüten/mit der aller höhesten gedult getra-
gen.

Zu dem/itzt auff dem Reichstage / da auff der
Papisten seiten / solch dreyen / trotzen/pochen/hö-
nen vnd spotten/den vnsern widderfaren ist / haben
die vnsern sich auffstieffest jmer gedemütigt/schlecht
mit füßen vber sich lassen gehen/vnd dennoch jmer
friede gebeten/geslehet vnd alles erboten/was Gott
leiden mag. Vnd wenn vnser teil eitel bettel buben ge-
west weren/were es doch mehr denn zu viel gewest/
ich wil geschweigen/das solch/hohe/grosse/fursten/
herrn/frum vnd redliche lente/sind/Das ich achte/
Solch

Solchs bekentnis/solch demut vnd gedult/sey nicht
viel geschehen/weil die Christenheit gestanden / vnd
meiner hoffnung/die grössste sein sol/vor dem jüng-
sten tage / Noch hilffts nicht. Der Müntzer vnd die
auffrürer haben solchs nicht gethan / Sondern / sie
theten/wie itzt die Papisten thun/Wolten auch we-
der friede haben noch geben / griffen mit gewalt
drein/liessen kein mittel noch erbieten gelten/Schle-
cht mit dem kopff hindurff / Wolten dazu ire lere
nicht lassen verhören/wie doch die vnsern itzt gethan
zu Augspurg/Sondern schlecht alle lere verdampt/
vnd ire eigen gerhümet / inn aller masse / wie itzt die
Papisten jr schrift auch nicht haben wollen von sich
ans liecht geben/vnd doch vnser lere verdampt / da
von weiter hernach/ Das kurtz vmb/Dns kein schuld
noch vrsach/weder kriegs noch auffrurs / mag auff-
gelegt werden/weder fur Gott noch fur der welt.

So nu vnser gewissen/solchs falls/vnschuldig/
rein vnd sicher ist / vnd der Papisten gewissen schül-
dig/vnrein vnd sorglich sein mus/So las frölich her-
gehen/vnd auffss ergest geraten / Es sey krieg odder
auffrur / wie das selb Gottes zorn verhängen wil /
Wird ein auffrur drans/So kan mich vnd die mei-
nen/mein Gott vnd Herr Ihesus Christus wol er-
retten/wie er den lieben Lot errettet zu Sodom / wie
er mich selbs auch errettet inn der nehesten auffrur/da
ich inn aller fahr / leibs vnd lebens/mehr denn ein
mal/schweben musste / Vnd ich doch damit solchen
danck verdienet habe/bey den verzweuelten buben/
Ich meine/die Papisten. Wil er mich nicht erretten/
so sey jm lob vnd danck gesagt/Ich hab lang gnug
gelebt/

gelebt / den tod wol verdienet / vnd meinen Herrn
Christum am Bapstum redlich angefangen zu rech-
en / Nach meinem tod / sollen sie aller erst / der Luther
recht füllen / wie wol auch itzt / wo ich inn solchem
Bepstischen vnd Pffessischen auffrur ermordet wer-
de / Do wil ich einen hauffen Bisschoff / Pffaffen vnd
Münche / mit mir nemen / das man sagen sol / Doctor
Martinus sey mit einer grossen procession zum grabe
bracht / Denn er ist ein grosser Doctor vber alle Bis-
schoue / Pffaffen vnd Münche / darumb sollen sie auch
mit im zum grabe gehen / auff dem ruckten / das man
dauon singen vnd sagen sol / Vnd wollen also zur letze
ein walfertlin miteinander thun / sie die Papisten / inn
abgrund der helle zu irem lügen vnd morden Gott /
dem sie mit liegen vnd morden gedienet / Ich zu meis-
nem Herrn Ihesu Christo / dem ich inn warheit vnd
friede gedienet habe.

Denn es ist gut zu rechen / Wer Doctor Luther
im auffrur tödtet / das der nicht viel der Pffaffen scho-
nen wird / So gehen wirs miteinander dahin / sie inn
aller teufel namen inn die helle / ich inn Gottes na-
men zum himel / Es kan mir doch niemand schaden
thun / das weis ich / so wenig als ich beger / jemand
schaden zu thun / Aber so böse sollen sie es nicht ma-
chen / ich wils noch erger mit in machen / Vnd so har-
te köpffe sollen sie nicht haben / ich wil noch hertern
kopff haben / Wenn sie gleich nicht allein diesen Kei-
ser Carol / sondern auch den Türckischen Keiser fur
sich hetten / Sie sollen mich nicht verzagt noch er-
schrocken machen / Sondern ich wil sie verzagt vnd
erschrocken machen / Sie sollen mir hinfurt weichen /
B ich

5.
Luthers
auffrur
Kaiser

Ich wil in nicht weichen / Ich wil bleiben / Sie sol-
len vntergehen / Sie habens zu weit verschen / Denn
mein leben sol jr hencker sein / Mein tod / sol jr Teufel
sein / Des vnd kein anders / Das sollen sie erfahren /
Vnd las sie nur itzt des getrost lachen.

Wird aber ein krieg daraus / So mus ich mich
aber mal leiden / sampt den meinen / vnd gewarten /
was vnser Gott hierinn raten vnd richten wird / Der
vns bis her trewlich beygestanden / vnd noch nie ver-
lassen hat. Vnd haben hierinn abermal grossen vor-
teil / Erstlich / Wir sterben odder verderben / so haben
wir des keinen schaden / Denn es stehet geschrieben /
Selig sind die verfolgung leiden vmb der gerechtig-
keit willen / Der das sagt / der leugt nicht / des sind wir
gewis / So wissen vnd bekennen die Papisten selbs /
vnd dancke in der Teufel / das sie anders sagen solten /
das vnser lere widder keinen Artickel des glaubens
noch widder die heilige schrift sey / Sondern sey wid-
der jrer Kirchen brauch vnd der Bepste gesetzte / Dar-
umb sie vns auch nicht mügen Ketzzer schelten / odder
müssen lügen straffen jr eigen hertz vnd maul / weil
keiner kan ein Ketzzer gescholten werden / der nicht
widder die heiligen schrift odder Artickel des glau-
bens leret / Viel weniger können sie vns als Ketzzer
straffen odder bekriegen / Haben auch bis her / als die
lügenere widder sich selbs / mörder vnd verrether /
Lenhard Kesper vnd der gleichen / fur Ketzzer gelestert /
verbrand / ermordet vnd verfolget / darüber sie auch
noch keine rew odder busse haben / Sondern inn sol-
chem blut vnd lügen verstockt bleiben / Wer solt sich
denn fur solchen kriegern fürchten ?

Zum an

5.
Zum andern / So wissen wir / das sie solchen
Krieg nicht mügen inn Gottes namen anfahen / Kön-
nen auch nicht beten / noch Gott vmb hülff anruffen.
Vnd trotz sey in allen / beide semplich vnd sonderlich
gebotten / das sie thürsten von hertzen zu Gott sagen /
Hilff vns Gott inn dieser sachen / Kriegen / Denn ir
gewissen ist zu hoch beschweret / nicht allein mit lü-
gen / lestern / blut / mord vnd allen geweln / sondern
auch vber das alles / mit verstocktem / vnbusfertigem
hertzen vnd sunden inn den heiligen geist. Darumb
weil sie mit bösem gewissen vmb lesterlicher sachen
willen Kriegen / sollen sie auch kein glück noch heil ha-
ben / So wollen wir dazu einen segen vber sie sprech-
en / der sol also heissen / So frum ir fur Gott seid / vnd
so gute sache ir habt zu Kriegen / so gros glück vnd
sieg gebe euch Gott / Amen. Vnd müsse euch gehen /
wie es vns Deudschen gieng / da wir widder Sanct
Johannes Nus auch anfiengen den friede zu brech-
en vnd die Behemen bekriegten / vnd vns der Bapst
auch auff die fleisch bancck opfferte / das wir im seine
lust büssen musten / mit vnserm blut vnd köpffen / vnd
stritten widder die warheit vnd gerechtigkeit / Wie ir
itzt thut / auff das der Bapst abermal etwas habe
inn die faust zu lachen / wenn er vnter vns ein solch
lüstig blutbad zugericht hat / der aller heiligste Vater
vnd hütigste hirte vnser seelen / Gott kan aber wol et-
wa einen Juda Machabeum erwecken (ob gleich
ich vnd die meinen still sitzen vnd leiden) der den
Antiochum mit seinem heer / zur schmettere vnd recht
Kriegen lere / wie er vns an den Behemen lerete Krie-
gen vnd friede halten.

B ij So wil

So wil ich auch sampt den meinen nicht feiren
mit beten vnd flehen zu Gott/das er in gebe ein ver-
zagt/blödes/feiges hertz/wenn sie zu felde ligen/das
hie einen vnd dort einen/sein gewissen rüre vnd beiße/
Vnd spreche / O we/O we / Ich bin inn ferlichem
Kriege / wir haben böse sachen / vnd streiten widder
Gott vnd sein wort/Wie wills vns gehen? Wo faren
wir hin? Vnd wenn sie denn sehen einen Macha-
beischen daher ziehen gegen sie/das sie zu fliehen vnd
zu stieben / wie sprech vom winde / Meinstu nicht/
Gott könne solche kunst noch? wie er denn zu seinem
volck spricht / Ich wil dir ein verzagt hertz geben/
das/wenn du widder deine feinde eines weges aus-
zeuchest/söltu durch sieben wege zu ruck fliehen/vnd
ein rausschend blat sol euch schrecken / Warlich/so
thet er den verstockten Egyptern im roten meer auch/
welche wol so steiff vnd sicher waren/als die Papisten
sind/Noch da das stündlin kam/das jr gewissen sie
rüret/sprachen sie/O we/laßt vns fliehen/Got streitt
widder vns. Wer nicht weis/was da sey/mit bösem
gewissen vnd verzagtem hertzen Kriegen/Wolan/der
versuchs itzt/wenn die Papisten Kriegen / so sol ers
erfahren/gleich wie es vnser vorfaren an den Behe-
men vnd Zitzka erfuren inn gleichem fall. Vnd vnser
gebet/ sol vns nicht heel haben / wollens anzeigen
offentlich/nemlich/der siebenbe psalm/der an seiner
ersten schlacht/das gantz Israel schlug / das zwen-
zig tausent man mit Absalom auff der walstat tod
blieben/von einem kleinen heufflin erschlagen/Denn
er hat büchsen/puluer vnd harnisch gnug/Das weis
ich gewis.

Zum dritten.

5.
Zum dritten/Weil mir nicht gebüret zu Kriegen
noch zum Kriege zu raten odder zu reitzen/als einem
Prediger im geistlichen ampt / Sondern viel mehr
vom Kriege zum Frieden raten / wie ich auch bis her
auff's vleissigst gethan/das mir alle welt zengen mus/
Aber doch vnser feinde nicht wollen friede/sondern
Krieg haben/Kompts denn dazu/das ein Krieg ange-
het/So wil ich warlich meine fedder auch still halten
vnd schweigen/vnd mich nicht mehr so drein legen/
wie ich thet inn der nehesten auffrur / Sondern wil
auch lassen gehen/was da gehet/vnd solt gleich kein
Bischoff / noch Pfaff / noch Münch bleiben / vnd
ich selbs auch mit vntergehen/Denn jr trotzen vnd
rhümen ist Gott zu vnleidlich/vnd jr verstockt hertz
machts zu hart vnd zu viel/Sie sind vber alle masse
hoch gnug gebeten/ermanet/vnd vmb friede ersucht/
Sie wollens durch fleisch vnd blut hinaus trotzen/
So wil ichs durch geist vnd Gott auch mit in hinaus
trotzen/Vnd hinfurt nicht einen odder zween Papi-
sten/Sondern das gantz Papstum auff mich gela-
den haben/bis das der Richter im himel drein zeich-
ne / Ich wil vnd kan mich fur solchen elenden Gottes
feinden nicht furchten/jr trotz ist mein stoltz/jr zür-
nen ist mein lachen/Sie können mir nicht mehr denn
einen sack vol sieches fleisch nemen/Was ich aber in
nemen kan/das sollen sie inn kurtz erfahren.

Weiter/Wo es zum Kriege kompt/da Gott fur
sey/So wil ich/das teil/so sich widder die mördische
vnd blutgyrige Paristen zur wehre setzt/nicht auffrü-
rissch gescholten haben noch schelten lassen / Son-
dern/wils lassen gehen vnd geschehen/das sie es ei-

B ij ne notz

Ne not wehre heissen/vnd wil sie damit ins Recht vnd
zu den Juristen weisen/Denn inn solchem fall/wenn
die mörder vnd Bluthunde/ihre Kriegen vnd morden
wollen / so ist auch inn der warheit keine auffrur/
sich widder sie setzen vnd wehren/Nicht/das ich hie
mit wolle jemand reitzen noch erwecken/zu solcher ge
gen wehre/noch sie rechtfertigen/denn das ist meins
ampts nicht/viel weniger auch meines richtens od
der vrteils/Ein Christ weis wol was er thun sol/das
er Gott gebe/was Gottes ist/vnd dem Keiser auch/
was des Keisers ist/Aber doch nicht den Bluthun
den/was nicht jr ist/Sondern/das ich ein vnterschied
gebe/zwischen auffrur vnd andern thaten/Vnd den
Bluthunden/den schand deckel nicht lassen wil/das
sie rhümen solten/als kriegten sie widder auffrürische
leute / vnd hettens guten fug nach weltlichem vnd
Göttlichem Rechte/wie sich das Ketzlin gern putzen
wolte vnd schmücken/Des gleichen wil ich der leute
gewissen nicht beschweret lassen / mit der fahr vnd
sorge/als sey jr gegen wehre auffrürisch/Denn sol
cher name ist zu böse vnd zu schwer inn solchem fall/
Es sol einen andern namen haben/Den werden die
Rechte wol finden.

Man mus nicht alles auffrürisch sein lassen/was
die bluthunde/auffrürisch schelten/Denn damit wol
len sie aller welt/das maul vnd die faust binden/das
sie niemand / weder mit predigen straffen / noch mit
der faust sich wehren solle/vnd sie ein offen maul vnd
freie hand behalten/Wollen also durch den namen
der auffrur alle welt schrecken vnd fahen/sich selbs
aber trösten vnd sicher machen / Mein lieber gesell/
man

man müst dir / die definition vnd deutung anders fur
legen. Auffrur ist nicht / wenn einer widder das Recht
thut / Sonst müsten alle vbertretung des Rechten /
auffrur heissen / Sondern der heisst ein auffrürer / der
die Oberkeit vnd Recht nicht leiden wil / sondern
greiff sie an vnd streit widder sie / vnd wil sie vnter
drucken / vnd selbs Herr sein vnd Recht stellen / wie
der Müntzer thet (Aliud est inuasor / aliud transgres
sor) Das heisst recht ein auffrürischer / Das also die
gegen wehre widder die Bluthunde / nicht auffrürisch
sein kan / Denn die Papisten fahen an vnd wollen
Kriegen / vnd nicht friede halten / noch den andern
lassen / die doch gerne friede hetten / Das also die Pa
pisten / dem namen vnd der tugent / so auffrur heisst /
viel neher sind.

Denn sie haben gar kein recht / weder Göttlich noch
weltlich / fur sich / Sondern handeln aus bosheit /
widder alle Göttliche vnd weltliche Recht / als / die
mörder vnd bösewicht / Das ist leichtlich zu bewei
sen / Denn sie wissen selbs wol / das vnser lere recht
ist / vnd wollen sie doch ausrotten / wie denn ein gros
ser Niclas Bisschoff zu Augspurg selbs gesagt hat /
Er möchte leiden / das allenthalben so gehalten wür
de / wie zu Wittemberg / Aber das aus dem loch vnd
winckel / solche lere solt anfahen vnd austomen / das
sey nicht zu leiden / Wie dunckt dich ? Sind das nicht
seine Bisschoffliche wort ? Des gleichen hat der Be
pstlich Legat Cardinal Campegius / auch bekand /
Er künde wol solche lere zulassen / Aber / Es wür
de ein gros Exempel draus werden / das man es an
dern Nation vnd Königreichen auch müste zulassen /
das sey

5.
Lufin

2. 2.
abel
Me
Bibl
N.

das sey aber nicht leidlich / Vnd ein ander grosser
Bischoff auch gesagt / von iren gelereten / also / Un-
sere gelereten vertheydingen vns fein / Sie bekennen
selbs / das vnser ding nicht gegründet sey inn der
schriff / Also / das sie fast wol wissen / das vnser lere
nicht vnrecht / sondern inn der schriff gegründet sey /
Vnd doch mutwilliglich vns verdammen vnd die lere
ausrotten wollen / widder Göttlich Recht vnd
Warheit .

Das sie aber auch widder Keiserlich vnd natür-
lich recht handeln / ist offenbar / Denn sie haben erst-
lich vnser teil / schwerlich zu verhör komen lassen /
Darnach / da sie jr langsam / faule widderrede münd-
lich drauff gethan / haben sie schlecht des fein ab-
schriff wollen von sich geben / noch zur verantwort
vnser komen lassen / wie die fleddermeuse das liecht ge-
schewet / bis auff diesen tag / Nu ist ja beide Gött-
lich / Keiserlich vnd natürlich Recht / welchs auch der
heide Portius vber S. Paul widder die Juden hielt /
das man solle nicht verdammen / man höre denn zu-
vor die antwort des verdampften / Denn Gott wolt
Adam auch nicht verdammen / Er foddert in zuvor
zur antwort. Wir aber sind itzt zu Augspurg willig-
lich erschienen / vnd zur antwort vns mit aller demut
vnd vleis erboten / Vnd ist vns doch mit allem freuel
vnd mutwillen abgeschlagen / Ist auch ire widderre-
de / wie hoch vnd viel wir drumb baten / vns nicht zu-
gestellet / vnd sind gleich wol verdampft von den heil-
ligen Vetern inn Gott / vnd von den Christlichen
Fürsten / O feine Lerer / O schöne Richter / Die alle
welt zwingen zu gleuben / vnd thüren nicht an tag ge-
ben /

ben/was es sey/das man glauben sol/Ich sol glen-
ben/vnd doch nicht wissen/was ich glauben sol/Ich
mus irrig heissen/Aber man wil nicht anzeigen/war-
umb ich irre.

D ir vnseligen / alle / die ir auff's Papsts seiten
seid gewesen zu Augspurg / Es werden sich ewer sche-
men müssen ewiglich / alle ewer nach komen / vnd
nicht frölich hören euch nennen / das sie solche vns-
selige vorfaren gehabt haben. Wenn wir das liecht
geschewet / vnd nicht hetten wollen antworten / sol-
tet ir die gewesen sein / die vns dazu gedrungen het-
ten / Nu komen wir / vnd wollen nicht allein gerne
antworten / sondern / bitten / ruffen / schreien / das
wir antworten mügen / verzeren drüber gros gut/
verseumen viel mehr/vnd leiden alle schmach/spot/
hon vnd fahr/vnd ir habt vns das alles schendlich
vnd bösllich gewegert / Also auch / wenn wir ewer
fleddermans odder nachteule / nemlich / ewer Wido-
derrede/nicht hetten begert/noch haben wollen/sol-
tet ir die gewesen sein/die vns die selbigen/on vnsern
willen hetten vberreicht vnd ausgelassen / Nu bitten
wir drumb/klagen vnd foddern mit allem anhalten/
vnd ir versagt ewer Widderrede/vnd schlägt vns ab
vnser Antwort.

D des schendlichen Reichstages / des gleichen
nie gehalten/vnd nie gehöret ist/vnd nimer mehr ge-
halten noch gehöret werden sol/solcher schendlichen
handlung halben/der allen Fürsten vnd dem gan-
tzen Reich/ein ewiger schandfleck sein mus / vnd alle
vns Deudschen fur Gott vnd aller welt schamrot
C machet/

machtet/ Was wil hie zu der Türck sagen / vnd sein
gantzes Reich/wenn sie solche vnerhörete handlung
von vnserm Reich hören werden? Was werden die
Tattern vnd Moscobiten dazu sagen? Wer wil hin-
furt vnter dem gantzen himel sich für vns Deudschen
fürchten/odder etwas redlichs von vns halten/wenn
sie hören/das wir vns den verfluchten Bapst mit sei-
nen laruen/also lassen effen / nerren / zu kinder / ja zu
klötzen vnd blöchen machen/das wir vmb jr lester-
lich/Sodomitisch/schendlich/leren vnd leben willen/
so schendlich/ja vber vnd vber schendlich/jnn offento-
lichem Reichstage widder Recht vnd Warheit han-
deln? Es solt billich einen iglichen Deudschen gere-
wen/das er Deudsch geboren were / vnd ein Deuds-
scher heissen sol.

2
2
2
2
Doch wil ich wol glauben/das sie für sonderlicher
grosser klugheit/solch jr Widderrede vnd feines büch-
lin inne behalten/weil jr gewissen selbs wol fület/das
es faul/lose/kalt ding ist/des sie sich schemen müsten/
wo es austeme vnd sich im liecht solt sehen lassen od-
der antwort leiden/Denn ich kenne die hochgelarten
Doctores wol/die wol sechs wochen drüber gekocht
vnd gebrewet haben/Ob sie schon für den vnwissen-
den/der sachen mit plaudern eine nasen machen könn-
nen/Wenns aber auff's papir kömpt/so hats weder
hende noch füsse/Sondern ligt da vber einem wüsten
hauffen/als hette es ein trunckenbold eraus gespeiet/
wie man das sonderlich jnn D. Schmid vnd D. Eck-
en schriften sibet/Es wil doch widder klingen noch
klappen/wenn sie mit schreiben dran sollen/Darumb
vleißigen sie sich mehr des schreiens vnd plauderns.
So hab

5.
So hab ich auch erfahren / Das/da die Bekent-
nis der vnsern gelesen ist / haben sich der widder teil
viel verwundert vnd beband / Es sey die lauter war-
heit / Man könne es mit der Schrifft nicht widderles-
gen. Widderumb / da man ire Widderrede gelesen
hat / haben sie die köpffe nidder gehenckt / vnd mit ge-
berden bekennet / das es faul vnd lose ding sey / gegen
der vnsern Bekentnis / Die vnsern aber vnd viel frum-
mer hertzen / sind höchlich erfrewet vnd trefflich ge-
sterckt / da sie gehöret / das ihene aus aller irer macht
vnd kunst / die sie dazumal mussten auff's höchst beweis-
sen / nichts anders erfür wusten zu bringen / denn sol-
che lose Widderrede / der itzt / Gott lob / ein weib / ein
kind / ein Leie / ein baur / mans gnug ist widder zu ste-
hen / mit gutem grunde der schrifft vnd warheit / Vnd
das ist auch die rechte gründliche ursache / warumb sie
solche Widderrede nicht wolten vberreichen / Es gra-
wet den flüchtigen bösen gewissen fur in selbs / vnd
mochten der warheit antwort nicht gewarten.

Vnd ist leichtlich zu mercken / das sie inn solcher zu-
uersicht gestanden / vnd diesen Reichstag angericht /
das sie gewislich gemeinet haben / vnser teil sollte ni-
mer so keck sein / das sie erscheinen würden / Sondern
wo sie den Keiser personlich inn Deudschland brech-
ten / würde jederman erschrecken / vnd zu in sagen /
Gnade herrn / was wollet jr haben ? Da in das gefei-
let / Vnd der Kurfürst zu Sachsen / der aller erste er-
schein / hilff Gott / wie begonsten in die hosen zu stin-
cken / wie war da alle solche ire zuuersicht verirret /
welch ein zu samen reiten vnd heimlich ratschlahen
vnd raunen hub sich da / Vnd musste doch niemand
C ij wissen /

wissen/Christus selbs / vnd ich auch nicht/was die
sachen weren/So wenig als wir vor diesem jar von
der Fürsten rotterey wusten. Aber das war die sum-
ma endlich/wie man wege vnd stege fünde/well die
vnsern so freidig vnd frölich erschienen die aller ers-
sten/das sie ja nicht verhöret würden / Da das auch
nicht gar sein kund/haben sie dennoch zu letzt / die
ehre eingelegt/das sie ire lose Wibderrede/nicht thur-
sten vberreichen/noch raum geben zu antworten.

Denn das vnuerschampt maul vnd blutdürstiger
Sophist Doctor Eck/freilich jr furnemester Rat-
gebe einer / hat sich mit öffentlichen Worten hören
lassen/für den vnsern/Das/wo der Keiser hette dem
Ratschlag / so zu Bononia beschlossen war / gefolgt
get / Vnd im einzug inn Deusch land / die Luthe-
risschen mit dem schwerd flugs vnd frisch angegrif-
fen / einen nach dem andern geköpfft / So were der
sachen wol rat worden / Aber da er den Kurfürsten
zu Sachsen hette lassen durch seinen Kantzler reden
vnd verhören / were solches alles gehindert. Wie
dunckt dich vmb solche Doctores vnd heilige Peter?
wie voller liebe vnd warheit sticken sie? Also muste
gleich wol erans brechen/der heimliche Rat / so Be-
pstliche heiligkeit zu Bononia gehandelt hatte mit
dem Keiser/Aber welch ein fein spiel solte auch dar-
aus worden sein/wo der Keiser/solchem Bepstlichem
vnd Teufelischem ratschlag nach/hette die sache mit
morden angegriffen / Da solt ein Reichstag worden
sein/ das weder von Bisschouen noch von Fürsten
ein fingernagel blieben were / sonderlich inn solcher
ferlicher zeit / da alles so rege vnd wege stund / vnd al-
le welt

5.
le welt eins gnedigen Reichstages wartet/wie denn
die ansschreibung auch anzeigt vnd furwendet / vnd
doch leider nicht so gehalten ist.

Es möcht aber jemand sagen / Der Keiser hab
solche widderrede ihenes teils den vnsern wollen vber
reichen / so fern die vnsern sich verpflichten wolten/
das es nicht außkeme odder offenbar würde. Das ist
war / vnd ist also angemutet den vnsern / Aber hie
greiffe vnd tappe doch jederman / ob er gleich weder
sehen noch hören künde / was doch das fur leute
sind / die jr ding nicht wollen noch thüren lassen ans
liecht komen? Ists so köstlich ding vnd wol gegründe
det inn der schrift / wie sie schreien vnd rhümen / war
umb schewet es das liecht? Was hilffts / solche offent
liche sachen / so man doch bey in mus leren vnd hal
ten / fur vns vnd jederman zu verbergen? Ists aber
vngegründet / vnd lose ding / Warumb haben sie
denn lassen im ersten abschied / durch den Kurfürsten
zu Brandenburg / ausruffen vnd schriftlich von sich
geben / Es sey der vnsern Bekenntnis mit der schrift
vnd gutem grund verlegt? Wenn das war were vnd
jr eigen gewissen sie nicht hierinn selbs lügenstraffet/
so hetten sie solch köstliche wolgegründete Verlegung
nicht allein lassen lesen / Sondern auch schriftlich
von sich gegeben vnd gesagt / Da habt jrs / trotz ders
verantworte / Wie wir mit vnser Bekenntnis gethan
haben vnd noch thun.

Aber Christus mus warhafftig bleiben / da er sagt/
Wer arges thut / der hasset das liecht / vnd kompt
nicht ans liecht / auff das seine werck nicht gestrafft
C ij werden/

werden / Wer aber die warheit thut / der kompt ans
liecht / auff das seine werck offenbar werden / wie sie
inn Gott geschehen sind. Diesem vrtail Christi
nach / hat Gott die vnsern von diesem Reichstage mit
solchen ewigen ehren komen lassen / das auch das
widderteil mus bekennen / wie wir das liecht nicht ge
schewet / sondern auff's aller freiest vnd frölichst ge
sucht vnd gewartet haben / Sie aber weder mit solcher
vnd ewiger schanden da gelassen / das sie / wie die
nachteulen vnd fleddermeuse / ja wie jr Vater der lü
gen vnd des mordes / das liecht auff's aller schend
lichst vnd offenberlich geflohen vnd geschewet ha
ben / vnd auff jr lose / faule / finster geschwetz / der ant
wort nicht gewarten noch leiden mügen.

So ist das auch ein fein Christlich stücklin / das die
vnsern sich verpflichten solten / da fur zu sein / damit
solch köstlich kunst vnd wolgegründte weisheit irer
Widderrede / nicht ankeme noch offenbar würde.
Wie gar hat doch Gott die Papisten verblindet vnd
geschendet / das sie wedder vernunfft noch scham
mehr haben / Wie ist's doch möglich / ich wil schwei
gen / wie billich / sich verpflichten / Ein solche schrift
heimlich zu halten / die vnter so viel hende komen mü
ste / vnd zuuor ein mal fur dem Reich gelesen ist? Vnd
wo sie etwa hernach durch ihenes teil selbs were aus
komen / so müst es der vnsern schuld sein / Aber solche
flugheit vnd hübsche rencke mus die Gottlose ver
nunfft suchen / weil sie die warheit vnd das liecht nicht
leiden mag / Vnd künde auch sonst kein bessern be
helff finden / da mit sie im finstern bleiben möchte /
vnd jr Widderrede nicht von sich geben müste / Wo
lan / so

lan/so bleibe sie im finsternis/wie sie ist/vnd sol auch
im ewigen hellischen finsternis dazu bleiben / vnd
doch am Jüngsten gericht/wo es nicht ehe geschicht/
all zu helle an tag komen.

Ja sprechestu/Ob sie wol ire Widderrede odder
Verlegung/nicht haben von sich gegeben noch ver-
antworten lassen/So haben sie dafür einen Ausschus
gemacht/etlichen Fürsten vnd gelerten/beides teils/
von der sachen vnternander frendlich zu handeln/
befolhen / Ey putz dich / schmück dich ketzlin / Es
werden vns geste komen/Wie alber vnd nerrisch ist
der arme man Christus/der solche tücke so gar nicht
mercken kan/Der Ausschus ist gehalten/das ist war/
Aber was hat man drinnen gehandelt? Nichts vber-
all von irer Verlegung odder Widderrede / die ist im
finstern blieben/Vnd der Ausschus musste die nasen
helffen machen/das ire lose Verlegung/mit etwa ei-
nem glimpff / innebehalten vnd nicht erans komen
müste / Denn man hat im Ausschus nicht ire Verle-
gung dargelegt/Sondern vnser Bekenntnis furgeno-
men vnd mit den vnsern darauff gehandelt / wie viel
wir danon nachlassen vnd widderruffen (odder wie
sie es deuten) mit inen vns vergleichen wolten/Alles
dahin geerbeitet vnd gericht/das sie mit grossen ge-
limpff schreien möchten / Sehet / lieben leute / höret
alle welt/wie verstockt vnd halstarrig sind die Luthe-
rissen/Erstlich ist jr Bekenntnis mit schrift vnd wol-
gegründten vrsachen verlegt / Darnach / frendlich
mit inen gehandelt/Was sol man mehr thun? Sie
wollen nicht weichen/sie werden vberwunden odder
freundlich vnterricht.

Wolan/

Wolan/das lügengeschrey müssen wir lassen gehen/Es sol sie doch nicht helffen/das weis ich/So hat sie auch Gott bereit an inn solchem rhümen/lügengestrafft / Denn da solcher abschied ist durch den Kurfürsten zu Brandenburg ausgeruffen vnd gegeben/das vnser Bekenntnis sey mit schrift vnd gutem grund verlegt / habens die vnsern nicht angenommen noch dazu still geschwigen/Sondern frey öffentlich fur dem Keiser vnd Reich / widderprochen vnd bezeugt/das vnser Bekenntnis sey nicht verlegt/sondern der massen gestellet vnd gegründet/das auch die hellischen pforten nichts dawidder vermügen/Solche schlappen musten sie widder inn sich fressen/Denn es ist auff Deudsch so viel gesagt / Was der Kurfürst von Brandenburg im abschied ausgeruffen hat/das ist nicht war/sondern erlogen / Das ist recht / Denn die wolgegründte Verlegung ist noch nicht am liecht/sondern schlefft villeicht bey dem alten Danhenser im Venus berge,

Weil nu das am tage ist / das sie ire Widderlegung im finsternis behalten vnd nicht von sich ans liecht geben haben/So ist nicht allein das eine öffentliche vnuerschampte lügen / das sie furgeben haben/vnser Bekenntnis sey mit schrift vnd gutem grunde verlegt / Sondern das ist des Teufels selbs lügenmaul/das sie noch dazu rhümen/vnd zu irem glimpff sich putzen vnd schreien thüren/das wir vberwunden sind / vnd nicht wollen weichen / wie wol sie ir gewissen gewaltiglich solcher lügen vberzeuget. Das man allenthalben greiffen mus/wie sie zum glimpff geeilet/wie denn alle die thun/so böse sachen haben/
vnd

vnd sich so jemerlich flicken vnd allerley renccke such-
en/das ire böse sachen/ja nicht ans liecht kome/Vnd
summa/offenbar wird/das sie an irer sachen verzagt/
nichts weniger sich versehen haben/denn das die
vnsern komen vnd erscheinen würden/So gar haben
sie sich auff lauter gewalt vertröstet/vnd auff keine
warheit noch liecht sich gericht.

Wie freundlich sie es auch mit dem Ausschus ge-
meinet haben ist leichtlich an dem einigen stück zu
mercken/das sie/vnter andern Artickeln haben den
vnsern thüren annuten/Das wir von beider gestalt
des Sacraments/solten also leren/Es seie nicht vn-
recht/sondern recht/das man auch einerley gestalt
alleine/gebe vnd neme/Wo wir das theten/als denn
wolten sie vns widderumb zugeben vnd leren lassen/
das wir beider gestalt geben vnd nemen möchten/
Ist nicht das eine grosse freundschaft? Wer hetie
sich solcher liebe zu solchen leuten versehen? Bis
her haben sie/fur Ketzer/alle die verfolget/vnd alle
plage angelegt/so beider gestalt genossen haben/
Itzt aber wollen sie es Recht vnd Christlich/heissen
vnd sein lassen/wo wir widderumb leren/das sie mit
einer gestalt auch recht vnd Christlich handeln/Das
heisst auff Deudsch/kalt vnd warm aus einem maul
blasen/Es ist vnrecht/Vnd ist doch Vffrecht/was
vnd wie sie wollen/Noch mus es nicht erlogen
heissen.

Wo nu die vnsern solches hetten bewilligt vnd
angenomen/da solt sich aller erst ein rhümen vnd
schreien erhebt haben jnn aller welt/Schet lieben
D leute/

leute/Die Lutheriffchen widderruffen ire lere / Vor
hin haben sie gelert/ Es sey vnrecht/einerley gestalt
zu brauchen/Nu leren sie/Es sey recht/Nu höret jr/
das wir recht geleret/vnd sie mit irem eigenem Be
kenntnis vnrecht erfunden sind. Also haben sie ver
sucht/die trewen einfeltigen leute/mit diesem einigen
stück/alle ire greuel vnd Teufels thand zu bestetti
gen/vnd vns als widderruffer aller vnser lere zu schül
digen. Zu dem / hetten sie inn vnsern Kirchen / ire
giftige lere / durch vnsern eigen mund auffgericht/
vnd gleich wol daneben inn iren Kirchen/vnser lere
mit gewalt geweret/das jr mund vnser lere bey jnen
nichts hette geleret/Wolten sich also inn vnser Kirch
en dringen vnd pflantzen/durch vnsern eigen mund/
vnd gleich wol vns allzumal aus iren Kirchen schlies
sen. Sind es nicht feine/freundliche/gleiche mittel/
die zur freundlichen handlung wol dienen?

Aber wie die Verlegung ist/so ist der Ausschus
auch/Die Verlegung ist eine finster nachtenle / vnd
wil nicht ans liecht. Der Ausschus ist / eitel list vnd
falscher betrug/Vnd wie warhafftig vnd löblich der
rhum ist/das sie vnser Bekenntnis mit schrift vnd gu
tem grund verlegt haben / So warhafftig vnd red
lich ist auch der rhum/das sie freundliche handlung
furgewendet haben/Beides eitel lügen vnd teuffche
rey/Sie woltens freilich nicht gern/das wir also mit
jnen solten handlen. Aber ich hab jtz nicht furgeno
men vom handel dieses Reichstages zu schreiben/
noch ire Verlegung anzugreifen / Sol aber / wils
Gott/anch geschehen/ Sondern wil allein dis mal
haben anzeigen/wie die Papisten keinen friede/keine
warheit/

warheit/keine ruge wollen haben/Sondern mit dem
kopff hindurch / vnd entweder einen Krieg odder
Aufrrur stifften / es sey vns lieb odder leid / da wil
nichts fur helffen / Wir aber müßens wogen vnd
warten/weil vnser erbieten/flehen vnd schreien vmb
friede / nicht wil erhöret werden / noch vnser demut
vnd gedult etwas gelten/So las her faren/was nicht
bleiben kan.

Aber weil ich der Deudschen Prophet bin (Denn
solchen hoffertigen namen mus ich mir hinfurt selbs
zu messen / meinen Papisten vnd Eseln zur lust vnd
gefallen) So wil mir gleich wol / als einem trewen
Lerer/gebüren meine lieben Deudschen zu warnen/
fur irem schaden vnd fahr/vnd Christlich vnterricht
zu geben/ wes sie sich halten sollen / wo der Keiser
durch seine Teufel die Papisten verhetzt/auff bieten
würde zu kriegen widder vnser teils Fürsten vnd
Stedte/ Nicht/das ich Sorge/Keiserliche Majestet/
werde solchen gifftblasern folgen / vnd solchen vn-
billichen Krieg anfahen/Sondern/das ich das mei-
ne nicht versennen/vnd allenthalben auff alle eben-
theur/mein gewissen entschuldigt vnd vnbeschweret
erhalten wil / Denn es ist mir viel lieber/eine vbrige
vnd vnnötige vermanung vñ warnung gestellet/vnd
vergebliche bericht gethan / Denn das ichs versen-
net / vnd wo es anders gienge / denn ich mich ver-
messen hette / darnach zu langsam keme / vnd nicht
mehr hette / das mich tröstet / denn das wort / Non
Putassent / Ich hetts nicht gemeinet/Es ist (sprechen
die Weisen) auch zu sorgen/wenns gleich sicher ist/
Wie viel mehr ist itzt inn solchen seltzamen leufften/

D ij so

5.
Ja
bel
Me
Lib
N

so der Papisten wüten / Gottes zorn so gewolich reizt /
Keinem winde noch wetter zu trawen / es sehe wie
freundlich es wolle / Vnd Paulus Rom. xij. auch ge-
beut / Das die sorgen sollen / so andern fürstehen.

Welcher Deudscher nu meinem trewen rat fol-
gen wil / der folge / Wer nicht wil / der lasse es / Ich
suche hie mit nicht das meine / Sondern ewer / der
Deudschen heil vnd seligkeit. Mir künd für meine
person nicht bas geschehen / denn das mich die Pa-
pisten fressen / zürissen / zubissen / odder wie sie mir
sonst / aus dem sundlichen / tödlichen madensack /
hülffen / Ich spreche doch / wenn sie auff's höchst zür-
nen / Lieben Herrn / Zürnet jr / so gehet von der
wand / Thut inn ewer badekleid vnd hengers an den
hals / Vnd wil kurtz vmb von inen vngepocht vnd
vngetrotzt sein / Denn ich weis / wo meine sache ste-
het / vnd wo ich bleiben sol / Gott sey gelobt / Mügen
sie meinen dienst nicht zu irem besten annemen / So
dancke in der leidige Teufel / wo sie mir ein tröpflin
liebe odder gnade erzeigen / Dürffen sie meiner lere
nicht / So darff ich irer gnaden viel weniger / vnd
lasse sie zürnen vnd toben / inn aller Teufel namen /
So lache ich inn Gottes namen.

Das ist aber mein trewer Rat / das / wo der Kei-
ser würde auffbieten / vnd widder vnser teil vmb des
Bapsts sachen odder vnser lere willen / Kriegen welt /
als die Papisten itzt gewolich rhümen vnd trotzen
(ich mich aber zum Keiser noch nicht versehe) das
inn solchem fall / kein mensch / sich dazn gebrauchen
lasse / noch dem Keiser gehorsam sey / Sondern sey
gewis /

gewis/das im von Gott hart verboten ist/inn solch/ em fall/dem Keiser zu gehorchen / Vnd wer im gehorchet/das der wisse/wie er Gott vngehorsam/vnd sein leib vnd seel ewiglich vertriegen wird / Denn der Keiser handelt als denn nicht allein widder Gott vnd Göttlich Recht/sondern auch widder seine eigen Keiserliche Recht / eide/pflicht/siegel vnd brieue / Vnd das du nicht denckest/Solchs sey mein getichte odder ich gebe aus meinem kopff / dir solchen rat/So wil ich dir vrsachen vnd grund so starck vnd klar anzeigen/das du greiffen solt/Es sey nicht mein rat/Sondern Gottes ernstlichs vnd manchfeltiges strenges gebot / fur welchs zorn / du billich erschrecken solt/ vnd endlich auch erschrecken must.

Erstlich mus ich den Lieben Keiser Carol entschuldigen seiner person halben / Denn er hat bisher/auch itzt auff dem Reichstage/also sich erzeigt/das er aller welt gonst vnd liebe vberkomen hat / vnd würdig were/das im kein leid widerfure/Auch die vnsern/nichts anders / denn Keiserliche tugent vnd lob von im zu sagen wissen. Vnd das ich des alles etliche Exempel anzeige/So ist das ja eine wunderliche feltzame sanfftmut / das seine Keiserliche Maiestet/vnser lere nicht hat wollen verdammen / ob sie wol von geistlichen vnd weltlichen Fürsten / hefftiglich darauff gehetzt vnd gereitzt ist / mit vnableslichem anhalten/auch ehe er aus Spanien komen ist/Aber seine Maiestet hat gestanden/wie ein fels / vnd zum Reichstage geeilet/vnd ein gnedigs ausschreiben gethan / willens / die sachen gütlich vnd freundlich zu handeln/Sol auch gesagt haben. Es müsse ja nicht
D iij so gar

Carolus Carolus

so gar böse lere sein/weill so viel/grosser/hoher geler-
ter/vnd redlicher leute solchs annemen.

Welchs sich auch also erfunden hat zu Augspurg/
da vnser Bekentnis fur Keiserlicher Maiestet ist gele-
sen worden haben das widderteil selbs erfunden/das
diese lere nicht so böse sey/als sie durch ire giftigen
prediger vnd ohren bleser/vnd heffige Fürsten/ist fur
gebildet / Ja sie hatten sichs gar nicht versehen/das
so eine gute lere sein solt/haben jr viel selbs bekennet/
Es sey die lauter heilige schrift/man könne sie mit der
schrift nicht widderlegen / Des sie gar viel anders
zunor bericht waren gewesen / Das war auch die vr-
sache / warumb man schwerlich zu lies / das sie gele-
sen ward / Denn die Neidfürsten vnd giftige lügener
sorgeten wol/wo sie gelesen würde / das ire giftige
lügen müsten zu schanden werden/hetten gern gese-
hen/das Keiserliche Maiestet stracks vngelesen vnd
vngehörst alles verdampft hette / Aber da seine Keiser-
liche Maiestet nicht kundte erhalten / das man sie
offentlich fur jederman lesen liesse / Thet sie dennoch
so viel/das man sie fur den Reichs stenden lesen vnd
hören muste / wie hoch auch solchs andern Fürsten
vnd Bisschouen vnd Sophisten widder war/vnd sie
bitterlich verdros.

Vnd wie wol gros gelt auff dem Reichstage ver-
zeret ist/Vnd scheint/als sey nichts ausgericht. So
sage ich doch fur mich / das / wenn schon noch
zweimal mehr verzeret were / So were allein mit dem
stück alles reichlich bezalet vnd gnug ausgericht/
Das Juncker Neidhard/vnd Meister Lügenhard/
inn irem

5.
J. 2
bel
Me
Bil
N

inn irem neiden vnd liegen zu schanden worden sind/
Vnd haben müssen sehen vnd hören/das vnser lere/
nicht widder die schrift noch articel des glaubens er-
funden ist/welche sie doch zunor mit liegen vnd nei-
den allenthalben/durch schrift/predigen vnd affter-
reden/so greulich gemacht haben/als sey nie kein er-
ger lere an tag komen/Solcher Neid/sage ich/ist auff
dem Reichstage geschendet/vnd solche lügen offen-
bar worden / Derhalben wir vnserm lieben Keiser
Carol hold sollen sein vnd dancken fur diese tugent/
das Gott durch in/zum anfang / Vnser lere hat he-
schmückt/vnd erlöset von den lügenhafftigen/lester-
lichen titeln der Ketzerey vnd andern schendlichen na-
men / Vnd also die lügener vnd neider gar redlich
auffs maul geschlagen / Wie wol sie ein eisern stirn
haben vnd sich nicht scheuen/Schadet aber nicht/
Der anfang ist vns gut sat/Es sol wol besser werden.

Item/ Keiserliche Maiestet/sol auch gesagt ha-
ben/Wenn die Pfaffen frum weren / so dürfften sie
keines Luthers/Was ist das anders gesagt / Denn
wie Salomon sagt/Des Königes lippen weissagen:
Denn seine Maiestet wil damit so viel anzeigen/das
der Luther sey der Pfaffen rute/vnd habens auch wol
verdienet/vnd seien nicht recht inn irem wesen / Das
ist auch gnugsam bekennet/von in selbs / Denn der
Bischoff zu Saltzburg hat zu Magister Philippus
gesagt/Ach/was wolt ir doch an vns Pfaffen refor-
mieren / Wir Pfaffen sind nie gut gewest / Da sihe
doch vnd höre die frumen leute / Sie wissen vnd be-
kennen/das sie böse sind vnd vnrecht haben/wollen
dazu auch so bleiben / vngereformirt sein / vnd der
offentz

Cg/ur

Magister Lany



offentlichen warheit nicht weichen / Vnd schreien
doch/vnd ruffen / Keiser vnd alle Fürsten an / man
solle für sie kriegen vnd schirmen/Was ist das anders
gesagt/denn so viel? Lieber Keiser/lieben Deusch-
en/Kriegt/vergießst ewr blut/setzt dran alle ewrgut/
leib/Kind vnd weib/auff das jr vns beschützet inn vn-
serm schendlichen/teufelischen leben vnd wesen/wid-
der die Warheit/die wir wol wissen / aber doch nicht
leiden können / vnd vns auch nicht bessern wollen/
Wie dunckt dich? Wenn du für solche leute kriegezt
vnd dein blut vergeußest/bistu nicht ein schöner mar-
terer/vnd hast dein blut vnd gut fast wol angelegt?

Ferdinandus
Item/ Da die vnsern/hatten ire Antwort wollen
Keiserlicher Maiestet vbergeben/widder der Sophi-
sten Verlegung/so viel man von der selben noch der
verlesung hatte behalten/Vnd Keiserliche Maiestet
itzt mit der hand darnach greiff vnd wolt sie an ne-
men/ Da zückt der König Ferdinandus/Keiserlicher
Maiestet hand zu rück/das solch Antwort nicht mu-
ste angenommen werden/Daraus abermal wol schei-
net/wer die leute sind/die vnter Keiserlicher Maiestet
namen/jren hass vnd neid treiben / So doch Keiser-
liche Maiestet wol anders gesinnet vnd geneigt were.

Item/ Da der Kurfürst zu Brandenburg im ab-
schied mit trefflichen/prechtigen/trotzigen worten/
hatte beschlossen/Wie Keiserliche Maiestet/Fürsten
vnd stende des Reichs sichs vereinigt hetten / das sie
land vnd leute/leib vnd gut vnd blut dran setzen wol-
ten/für welchen worten/die vnsern solten erschrecken/
Aber weil nicht da bey geredt ward (ob Gott wil)
blieben

blieben es wort/vnd vergiengen mit dem hall/Da der
aus war/da furcht sich auch niemand / Doch hatte
Keiserliche Maiestet hie abermal sich mercken lassen/
vnd solchen Redener/zwar nicht heissen liegen/Son-
dern gesagt/Es were zu viel geredt / Vnd gewonnen
viel andere grosse Fürsten vnd Herrn/hie zu schaffen/
wie sie solche wort glosiern möchten / Etlich gaben
fur/Es solte die meinung sein/Wo vnser teil wolte je-
mand ihenes teils mit gewalt angreifen/So wolten
sie leib vnd gut/land vnd leute zu samen setzen / So
doch vnser teil solchs niemals gedacht/Sondern all-
zeit vmb friede gebeten vnd geschrien haben/wie sie
selbs allesamt auff's aller beste wissen / Etlich aber
offentlich fur dem Keiser bezeugt/das sie inn solche re-
de des Marggrauen/nie gewilligt hetten/were auch
ire meinung nichts vber all.

Wie wol/land vnd leute sind mit dem maul bald
Genennet/Aber/ob man mit der faust der selbigen so
mechtig sey/zu blut/leib vnd gut auffzusetzen/on not/
dazu widder Gott vnd Recht/das solt ja die erfahrung
wol leren / Ich acht / Man wird sie zum wenigsten
zuor drumb fragen / vnd solch furhaben vnangezei-
get nicht lassen/So stehets auch drauff/ das Gott
nicht allzeit geben vnd thun mus / was wir dencken
vnd sagen thüren/Es hat wol grössern herrn jr maul
jemerlich gelogen/vnd ire anschlege sie schendlich be-
trogen/Aber das best ist/das sie Gott nicht dazu an-
ruffen odder sein doch gedechten/wenn sie so trotzen
vnd pochen. Doch spüret man hierinn/des Keisers
hertz/das er nicht so ein toller Bluthund ist/Vnd im
solche trotzige wort vnd werck nichts gefallen.

¶ Aber

5.
Casar 3

Ja
abel
Me
Lib
Nr

2.19.



Aber/Es mus dem lieben Keiser gehen/wie allen
frumen Fürsten vnd Herrn/Denn wo ein Fürst nicht
ein halber Teufel ist/Sondern mit der sensst regiern
wil/darans nicht anders sein/Es komen die grösses
sten schelcke vnd bösewichter ins Regiment vnd inn
die Empter/die thun denn/was sie wollen/vnter des
Fürsten namen/Denn sie dürffen sich nicht fürchten/
weil sie wissen/das der Fürst frum ist vnd lesst im gern
sagen/Was solt nu dieser frume Keiser vermügen/vn
ter so viel schelcken vnd bösewichten/sonderlich gegen
den Ertzbösewicht Bapst Clemen/der aller schalck
heit vol steckt/vnd bisher auch redlich am Keiser be
weist hat. Ich D. Luther bin gelerter inn der schrift/
denn der Keiser / auch mehr erfahren inn teglicher
vbung/Noch sorge ich/wo ich vnter so viel schelcken
sein solte/vnd jmer hören jr giftige zungen/vnd da
gegen kein ander vnterrichtung/Ich würde in war
lich auch allzu frum sein/vnd sie würden mich inn et
lichen stücken vberteuben/wie mir denn oft gesche
hen ist/durch etliche geister vnd flüglinge.

Darumb sol sich des niemand verwundern noch
entsetzen/ob vnter des Keisers namen verbot odder
briene ausgehen/widder Gott vnd Recht / Er kans
nicht wehren/Sondern sol gewis sein/das solchs al
les ist ein getrieb des obersten schalcks inn der welt/
des Bapsts/der solchs durch seine plattenhengst vnd
heuchler anrichtet/ob er vnter vns Deudschen künd
te ein blutbad stifften / das wir zu boden giengen/
Vnd gleube fur mich/Wo ers nicht wird durch die
sen Keiser enden/So wird er sich zum Türckischen
Keiser schlagen/vnd vns den selbigen auffladen/Da
selbst

5.
selbst werden wir denn finden/das gellt/so wir dem
Papist/fur sein Abblas vnd Fremerey so viel jar her ge-
geben haben/zum schatz widder den Türcken Krieg.

Das sey dis mal gnug gesagt von entschuldigung
des Keisers / Wollen nu die warnung thun / vnd vrs-
sachen anzeigen / darumb sich ein iglicher billich sol
schewen vnd fürchten / inn solchem fall / dem Keiser
zu gehorchen vnd widder vnser teil zu kriegen / Vnd
sage aber mal/wie droben / das ich niemand wil ra-
ten noch hetzen zu kriegen / Meins hertzen wunsch
vnd bitte ist / das man friede halte / vnd kein teil Krieg
anfahet noch vrsachen dazu gebe / Denn ich wil mein
gewissen vnbeschweret haben / vnd den namen weder
fur Gott noch der wellt tragen / das aus meinem rat
odder willen / jemand kriege odder sich wehre / ausge-
nomen die ihenigen / denen es befolhen ist / vnd recht
dazu haben / Rom. xiiij. Wo aber der Teufel die Papi-
sten so gar besessen hat / das sie nicht wollen noch kön-
nen friede haben noch leiden / vnd wollen schlechts
kriegen odder vrsachen dazu geben / Das sol auff
irem gewissen ligen / Ich mus es lassen geschehen /
weil mein wehren nicht gelten noch helffen wil.

Die erste vrsache / das du inn solchem fall / dem
Keiser nicht solt gehorsam sein vnd kriegen / ist diese /
Das du (so wol als der Keiser selbs auch) inn der
Taufse geschworen hast / das Euangelion Christi
zu halten / vnd nicht zu verfolgen noch zu bestreiten.
Nu weisen ja / das der Keiser / dieses falls / durch den
Papist gehetzt vnd betrogen wird / widder das Euan-
gelion Christi zustreiten / Weil vnser lere zu Augspurg
L ij öffentlich

*Die erste Ursache
ist die Taufe
folgt*

offentlich erfunden ist/das sie das recht Euangelion
vnd die heilige schrift sey. Vnd du solt also sagen zum
auffbot des Keisers odder deines Fürsten / Ja lieber
Keiser/lieber Fürst/wenn du deinen eyd vnd pflicht
inn der Tausse gethan/heltest/So soltu mein lieber
Herr sein/vnd wil dir gehorsam sein zu kriegen/wenn
du wilt/Wiltu aber dein Taussepflicht/vnd Christ-
lichen bund mit Christo gemacht/nicht halten/son-
dern verfolgen/So sey dir ein schalck an meiner stat
gehorsam/Ich wil vmb deinen willen nicht meinen
Gott lestern vnd sein wort verfolgen/vnd so frech inn
abgrund der hellen mit dir rennen vnd springen.

Diese erste vrsache begreiffet inn sich viel andere
grosse schreckliche vrsachen/Denn/Wer widder das
Euangelion ficht vnd streit / der mus auch zu gleich
streiten widder Got/widder Ihesum Christum/wid-
der den Heiligen geist/widder das theure blut Chri-
sti/widder sein sterben/widder Gottes wort/widder
alle Artickel des glaubens/widder alle Sacrament/
widder alle lere/so durchs Euangelion gegeben / be-
stettigt vnd erhalten werden / als von der Oberkeit
vnd weltlichem friede vnd stenden / Vnd Summa/
widder alle Engel vnd heiligen / widder himel vnd
erden vnd alle Creaturen / Denn / Wer widder Gott
streit / der mus widder alles streiten / das Gottes ist
odder das mit Gott hellt/Was aber das zu letzt fur
ein ende würde nemen/würdestu wol gewar werden.
Vnd das noch erger ist / Solchs streiten geschehe
wissentlich / Denn man weis vnd bekennet/das diese
lere sey das Euangelion/Der Türck vnd die Cattern/
wissen ja nicht/das es Gottes wort sey/Darumb kan
kein

kein Türck so böse sein/als du/Sondern du must zehen mal tieffer verdampt werden/denn alle Türcken/Tattern/Heiden vnd Jüden.

Wiewol es ein schreckliches ding ist/das bey den Christen dahin komen ist/das man solcher warnung bedürffen mus/gerade/als wüsten sie selbs nicht/wie ein greulich/schrecklich ding es sey/wissentlich/widder Gott vnd sein wort streiten / Das ist ein zeichen/das bey den Christen wenig rechter Christen/vnd viel erger Türcken vnter in sein müssen/denn inn der Türckey odder inn der helle dazu/Doch die rechten Christen/ob jr gleich wenig sind/wissens selbs wol/Dürffen auch solcher warnung nicht/Sondern die Papisten/welche den namen vnd schein der Christen/mit allen schanden füren/vnd sind doch zehen mal erger denn die Türcken/ Die mus man warnen / Willfts/so ist's gut / Willfts nicht/So sind doch wir entschuldigt/vnd ist jr straffe deste grösser/Denn der Türck ist so vnfinnig nicht / das er widder seinen Mahometh noch widder seinen Alloran streite odder tobe / wie vnser Teufel thun/die Papisten/vnd widder jr eigen Euangelion/das sie für recht erkennen / wüten vnd toben/Vnd machen damit/den Türcken gegen in/Am lauter heiligen/vnd sich zu rechten Teufeln.

Die Ander ursache ist / Wenn gleich vnser lere nicht recht were (wie sie doch alle anders wissen) So solt dich doch alleine allzu seer das abschrecken / das du mit solchem streiten / auff dich ladest / dich teils hafftig vnd schuldig machest für Gott/aller der greuel/die im gantzen Papstumb begangen sind vnd

Lij furt bes

Sprindla

32
bel
Me
Bil
17



furt begangen werden. Diese vrsache begreiffet inn
sich vnzelige gewel vnd alle bosheit/sunde vnd scha-
den/Kurtz/es ist die grundlose helle hie selbs/mit al-
len sunden/welcher du must aller teilhafftig sein/wo
du dem Keiser gehorsam bist / inn diesem fall / Aber
wir wollen der selbigen doch etliche erzelen vnd fur
die augen stellen/auff das sie nicht so vergessen wer-
den/Denn die Papisten wolten sich wol gern putzen
vnd solche gewel vnter die bancck stecken/vngebüffet
vnd vngembessert/bis zur zeit/da sie die selbigen künd-
ten widder erfur zihen vnd auffrichten.

Die mustu zu erst auff dich laden alle das schend-
liche leben / das sie gefüret haben vnd noch füren/
Denn sie gedenccken keines zu bessern / Sondern / du
solt dein blut vergiessen/vnd dein leben wogen / das
ir verflucht vnuerschampt leben/geschützt vnd erhal-
ten werde/Da kompt denn auff deinen hals vnd ge-
wissen / alle die hürerey / ehebrecherey vnd vnzucht/
so inn den Thümen vnd Stifften/bisher vnd noch/
geübet sind/Vnd mus dein hertz solchen rhum vnd
ehre haben/das es habe gestritten/fur die grösssten
vnd meisten hurn vnd buben / so auff erden sind / ir
hurn vnd buben leben zu bestettigen/vnd dich des al-
les teilhafftig zu machen/D das ist dir denn ein schö-
ner rhum vnd feine vrsache/dein leben zu wogen vnd
Gotte zu dienen/Denn sie bessern solch leben nicht/
könnens auch nicht bessern/Sintemal es vnmüglich
ist/das so viel tausent personen solten kensch leben/
wie sie doch furnemen.

Über das/mustu auch auff dich laden/die Bepst-
lichen

lichen vnd Cardinaliſſchen Keuſcheit / Welche iſt eine
beſondere Keuſcheit / vber die gemeinen geiſtlichen Keu-
ſcheit / vnd heiſſt auff Welſch / Puſeronen / nemlich /
die Sodomitiſche vnd Gomorriſche Keuſcheit / Denn
also muſte Gott ſeinen feind vnd widderſacher / den
Bapſt vnd Cardinel fur andern / blenden vnd pla-
gen / das ſie nicht werd blieben / mit weibsbilden natur-
licher weiſe zu ſundigen / Sondern irem verdienten
lohn nach / ir eigene lelbe vnd perſonen durch ſich
ſelbs ſchenden / Vnd dazu inn ſolchen verkereten / ver-
ſtockten ſinn geraten / das ſie ſolchs fur keine ſunde
hielten / Sondern damit ſchertzen / als were es ein Kar-
tenſpiel / daruber ſie lachen vnd frolich ſein mugen / on
fabr / V dem hier iſt recht gegeben / darumb giehrt
vnd ſcheumet es ſo wol (wie Judas ſagt) alle ſchan-
de vnd laſter heraus. Gehe nu hin vnd ſetze dein le-
ben dran / vnd ſtreite fur ſolche vnbusfertige / vnner-
ſchampte Puſeronen / die zu ſolchen leſterlichen ſun-
den noch lachen vnd damit ſchertzen.

Ich liege dir hie nicht / Wer zu Rom geweſt iſt /
der weiſ wol / das leider erger iſt / denn jemand ſagen
noch glauben mag. Da das neheſt Concilium Latera-
nenſe zu Rom vnter dem Bapſt Leo / ſolt beſchloſſen
werden / war vnter andern artikeln geſetzt / Das man
glauben ſolte / die ſeele ſey vnſterblich / Daraus man
greiffen mus / das ſie aus dem Ewigen leben ein lau-
ter gehey vnd geſpötte haben / Bekennen damit / das
bey inen gantz ein offentlicher glaub ſey / Es ſey kein
Ewigs leben / wollens aber nu mit einer Bulla leren.
Aber das war noch ſeiner / Inn der ſelbigen Bullen
hatten ſie geſetzt / das kein Cardinal ſolte hinfurt ſo
viel

viel schandbuben halten / Aber Bapst Leo / hatte es
heissen auslesschen / Sonst were es inn alle welt er-
schollen / wie frey vnd vnuerschampt der Bapst vnd
die Cardinel Sodomani zu Rom hielten. Ich wil
den Bapst nicht nennen / Aber weil die bösewichter /
nicht wollen büßen / sondern dazu das Euangelion
verdammnen / Gottes wort lestern vnd schenden / vnd
sich putzen / So sollen sie auch iren dreck widderumb
riechen / auff's aller schendlichst. Es ist solchs laster
so gar gemeine bey inen / das auch newlich ein Bapst
selbst / inn solcher sünde vnd laster / sich zu tod gesun-
digt / vnd inn der that auff der stet tod ist blieben /
Da / Da / jr Bepste / Cardinel / Papiſten / geistlichen
herrn / Verfolget mehr Gottes wort / Vertheydingt nu
ewer lere vnd Kirchen.

Nota

Solch schendlich leben / das so offenbar ist / strafft
kein Bapst / Cardinal / Bisschoff / Doctor / Pfaff /
Münch / Nonne / Sondern lachens / putzens / vnd
schmückens / hetzen Könige / Fürsten / land vnd leute /
das sie sollen / solche bösewichter / mit leib vnd gut /
mit landen vnd leuten / vertheydingen / vnd ja trewlich
werden / das solche laster nicht gebüßet noch gebessert /
sondern gesterckt / befreihet vnd gelobt werden / Die
zu soltu nu dein blut / leib vnd leben / wogen / das sol-
chs alles auff deinen hals vnd gewissen kome. Ich
wolt solchs gewels wol mehr exempel erzelen / Aber
es ist allzu schendlich / Müste sorgen / das vnser deud-
scher erdboden dafür zittern möchte / Kompt aber ein
vnuerschampter Bapst esel / vnd schreiet hiewidder / so
wil ich mich antreffen vnd heim finden lassen / das sol
wol getroffen heissen / Sol straffen vnd warnen / zur
busse

busse helffen / So sind sie vorhin / vnd hiemit gnug-
sam vermanet / Aber da wird nicht aus / Es ist nu eine
lößliche gemeine gewonheit worden / fast einer groß-
sen tugent gleich / die keine busse leidet / Sondern der
Keiser vnd du sollet sie hiez zu schützen vnd handha-
ben / auff das solch Exempel auch inn andern landen
aufftome vnd einreisse / wie leider bereit allzu viel fur
augen ist.

Darnach mustu auff dich laden alle den Geitz/
rauberey vnd dieberey des gantzen Papstums / Das
vnzelige gelt / so sie mit dem Ablass felschlich vnd be-
trieblich vberkomen haben / Ist nicht eitel schend-
licher raub vnd diebstal durch die gantze Christen-
heit ? Das vnzelige gelt / so sie durch jr erstuncken / er-
logten Fegfeur haben zu sich bracht / Ist nicht eitel
schendlicher raub vnd diebstal durch die gantze welt ?
Das vnzelige gelt / das sie mit wucher Messen vnd
opffer Messen kriegt haben / Ist nicht eitel schend-
licher raub vnd diebstal durch die gantze welt ? Das
vnzelige gelt / das sie mit butter brienen / walfarten /
heiligen dienst / vnd des geschwürms on zal / gewon-
nen haben / Ist nicht eitel schendlicher raub vnd dieb-
stal durch die gantze welt ? Wo her hat der Papst /
Cardinel / Bisschoue / Fürstenthüme / Königreiche /
vnd sind aller welt / weltliche herrn ? Ist nicht eitel vn-
messlich schendlicher raub vnd diebstal ? Was sind
sie nu anders / denn die aller grösssten reuber vnd die-
be / so die erden tregt ? Noch ist hie kein büssen odder
widder geben / Ja es ist nicht so viel guts bluts inn
iren adern / das sie jr ampt ein wenig vbeten / damit
sie doch / solche güter / mit etwa einem kleinen schein
der ehren

5.
Ja
abel
Me
Sich
N.



der ehren besessen / Sondern dagegen verdammen /
lestern / verfolgen sie Gottes namen / wort vnd werck
dazu / Kommen nu her / Du solt mit deinem blut solche
diebe vnd reuber verteydingen / das sie nicht allein vn-
gebüßet bleiben / sondern auch gesterckt werden / sol-
chs alles ihe lenger ihe mehr zu treiben. Da sihe du /
was fur ein grosser mechtiger dieb vnd schalck / reuber
vnd verrether du wirst vnd bist / wo du solche reuber
vnd diebe / mit deinem blut vnd leben sterckest vnd be-
schützeest / Denn du must es alles auff dich laden vnd
selbschuldig mit sein.

Darnach mustu auff dich laden alle das blut /
das der Bapst vergossen hat / alle mord vnd krieg /
die er angericht hat / allen jamer vnd hertzenleid / so
er inn aller welt gestiftet hat. Wer wil aber erzeilen /
alle das blut / mord vnd jamer / so der Bapst mit den
seinen zugericht hat? Etlich haben gerechent / das
vmb des Bapsts willen alleine (Sind das Bapstum
sich vber das Keiserthum erhaben hat) eilff mal hun-
dert tausent man erschlagen sind / Etliche rechen wol
mehr / Wo wiltu so viel mord vnd blut auff deinem
halse ertragen / so ein einiger mord vntreglich ist?
Vnd Christus auch den zorn im hertzen zum hellisch-
en feur verurtheilet / Matthej. 5. Was thustu nu / wenn
du fur solche mörder dein leben wogest? Du macheest
dich solches alles mit schuldig / Vnd hilffest den
Bapst stercken vnd freien / das er solchs ewiglich vnd
sicher thun müge / Denn da ist keine busse / Ja sie re-
chens fur lauter tugent vnd ehre / Das vnmüglich ist /
hie besserung zu hoffen / wie sie denn auch nicht bege-
ren / sondern / du solt sie helffen schützen / das sie on
auffhören

auffhören/vnd on wehren/on schewe/mügen mor-
den/blut störtzen/vnd die welt mit jamer erfüllen/
wie sie bisher gethan vnd noch thun/Sihe/das sind
die aller heiligsten Väter/die heiligen Cardinel/Bi-
schöue/geistlichen/die vber das Euangelion Richter
sein wollen/vnd die welt leren vnd regieren.

Ich wil hie der andern laster schweigen/wie sie mit
giff/verretherey/vnd alles/was zum has vnd neid
gehöret/handeln/Wer kans alles erzelen/das schend-
liche leben im Bapstum? Aus den obgesagten stü-
cken vnd teglichen Exempel kan mans wol nemen/
Denn er sol der Widder Christ sein / vnd mit allen
dingen/widder Christum sein/Drumb mus folgen/
das/so schön/herrlich/keusch/züchtig/heilig/hime-
lisch/Göttlich leben Christus gefüret vnd geleret hat/
so ein schendlich/lesterlich/vnzüchtig/verflucht/hel-
lisch/teufelisch leben mus sein Widder Christ/dage-
gen füren vnd leren / wie künde er sonst Christus
Widdersacher odder Widder Christ sein? Vnd were
doch alles zu leiden/wo sie es nicht noch dazu verthey-
dingen vnd mit gewalt recht haben wolten. Aber dis
ist noch alles/so zu rechen/schimpff vnd schertz/wir
wollen nu die rechten grundsuppen vnd heubt grewel
anzeigen/die du alle must auff dich laden/wer den
Bapst schützt/odder inn seinem vnbusfertigem/ver-
stocktem/Endechristischem stande vnd wesen/erhal-
ten vnd stercken hilfft.

Das leben künd man lassen böse sein/Aber die le-
re vnd Gottes wort verdammen/vnd sich vber Gott
selbs erheben/das kan man vnd sol auch niemand
F ü leiden/

leiden/viel weniger helffen verteydingen / Nu haben
sie so viel gewel der lere vnter die Christenheit getrie-
ben/das sie nicht zu erzelen sind / Welcher sie keine
büßen noch endern/Sondern alle verteydingt/ frey
vnd recht haben wollen mit gewalt/Das müste denn
alles auff deinem halse vnd gewissen ligen/vnd mü-
stest aller solcher gewel teilhafftig vnd schuldig sein/
wo du hülffest dafur streiten/ Vnd das wir der etliche
anzeigen/Wie wiltu ertragen auff deinem gewissen/
den schendlichen lügenhafftigen betrug des Abblas/
damit sie so viel tausent seelen/ja die gantze Christen-
heit vnd alle welt so schendlich verführet/betrogen/
vnd vmb jr gelt vnd gut beschissen haben/vnd den-
noch nichts büßen/auch nicht gedenccken danon ab-
zulassen/ob sie wol wissen/wie grosse büberey sie hie-
mit getrieben haben/Die leute haben sie geleret/jren
trost auff's Abblas setzen vnd drauff sterben/welchs
allein so schrecklich vnd gewulich ist / das / wenn sie
sonst so heilig vnd frum weren/als S. Johannes der
Teuffer / doch vmb dieses stücks willen billich inn
tieffesten abgrund der hellen verdampt solten sein /
vnd nicht werd/das sie die erden trüge/noch die son-
ne beschiene / schweige / das man noch dazu fur sie
streiten vnd verteydingen solt.

Denn rechen du selbst bey dir/was fur eine heubt-
büberey ist mit dem Abblas/Wer sich auff's Abblas ge-
tröstet vnd verlassen/vnd also gestorben odder gelebt
hat/der hat damit / den Heiland Ihesum Christum
müssen lassen faren/verleugnen vnd vergessen / vnd
gar keinen trost an jm haben mügen/Denn wer auff
etwas anders seinen trost setzt / denn auff Ihesum
Christ/

Christ/der kan keinen trost an Christo haben / Nu
wissen wir ja alle/vnd ire bücher beweifens gewaltig/
lich / das sie vns haben gelert auff's Ablas bawen/
wer wolt es sonst geachtet odder gekaufft haben?
Vnd haben daneben des glaubens an Christo / als
die teufels boten vnd böfewichter/schendlich geschwi-
gen/ja vnterdrückt vnd vertilget/Denn wer do weis/
das sein trost vnd zuuersicht stehe auff Christo / der
kan das Ablas noch keine ander zuuersicht nicht lei-
den/Wenn wollen sie aber solchen vnendlichen schä-
den/büssen vnd erstatten? Ja büssen/Sie wollen ver-
stockt inn solcher bosheit/noch dazu dich zwingen/
das du sie solt mit leib vnd blut vertheydingen/vnd al-
les auff dich laden. Wenn sie nicht gar besessen/vnd
rasend weren/So würden sie sich ein wenig schemen/
solch vertheydung/zubegeren/inn solcher vnbusferti-
ger/vnuerschampter/lesterlicher bosheit / Das mag
mir ja recht heissen/Pfaffen sind nicht gut.

Item / Wie wiltu auch tragen auff deinem ge-
wissen / den lesterlichen betrug des Fegfeurs / damit
sie auch alle wellt verretherlich generret vnd felschlich
erschreckt haben/vnd fast alle jr gut vnd pracht dar-
mit erlogen vnd gestolen/Denn damit haben sie den
einigen trost vnd zuuersicht an Christo/auch rein aus-
geleßcht / vnd die Christen geleret auff jr nach fol-
gende stift/gaffen/harren vnd sich verlassen / Denn
wer auff seine nachfolgende stift odder werck/im ster-
ben/gasset vnd hoffet (wie sie geleret vnd alle gethan
haben) der mus Christum aus den augen thun vnd
die weil vergessen / Also / wo nicht Gott sonderlich
hette die seinen erhalten/So hetten sie müssen im ster-
ben/

F ij ben/

ben/gleich wie die Juden vnd Heiden/inn der hellen
abgrund vnuersehens stürtzen/Gleich als wenn einer
von einem hohen berge stürtzet/da er meinet/er gien-
ge auff einem guten wege/vnd trette bey seit abe inn
die lufft/vnd siele hinunter ins tal odder meer/D wel-
che seelmörder sind das / Es wird bis an Jüngsten
tag kein menschlich hertz begreiffen / wie grossen
mord/ sie an den seelen begangen haben / mit irem
Fegfeur/Niel weniger ist zu begreiffen/welch einen
schaden vnd grewliche lesterung sie damit haben be-
gangen/andem glauben vnd zuuersicht an Christo/
Noch ist da kein büßen noch auffhören / Sondern
foddern/du solt sie darinn schützen vnd helfen ver-
teydingen.

Mose
Item/ Du must auff dich laden alle die grewel
vnd lesterung/so sie im gantzen Papstumb / mit der
lieben Messe begangen vñ noch teglich begehen/mit
keuffen vnd verkeuffen/mit viel vnzelichen andern vñ
ehren des heiligen Sacraments/Da sie Gotte seinen
son inner opffern / als weren sie besser vnd heiliger/
denn Gottes son/ Da sie das Sacrament/nicht eine
gabe Gottes lassen sein / die man mit dem glauben
empfaben sol/Sondern ein opffer vnd werck daraus
machen/damit sie sich selbs vnd andere leute versü-
nen/vnd allerley gnade vnd hülffe erwerben / Da sie
einem iglichen heiligen ein eigene Messe / ja einer ig-
lichen sachen odder not / eine eigene Messe gemacht
haben / Inn allen iren büchern vnd leren findestu
nicht einen buchstaben / vom glauben / Alles saget
vnd singet/wie die Messe ein opffer vnd werck sey/
So doch inn keinem stück/der glaube solte so fast vnd
vleißig

5.
fleißig getrieben vnd geübt werden / als inn der Mess-
se odder Sacrament / Weil es Christus selbst hat ein-
gesetzt / zu seinem gedechtnis / das man von im da
selbs solt predigen / vnd an in gedencken vnd glau-
ben / Aber dafur predigen sie jr opffer vnd werck / ver-
kenuffen die dazu auff's aller schendlichst / Noch ist da
kein büßen / sondern verstockte verzweuelte bosheit /
sich zuuerteydingen / noch durch dein leib vnd leben /
sich schützen.

Es were allzu grewlich gnug / der grobe eusser-
liche misbrauch / da die Pfaffen auff den begengnis-
sen vnd Kirchweyhung odder Patron festen / so leicht
fertig mit dem Sacrament handelten / als were es ein
gauckelspiel / Umb fressens / sauffens / gellts willen /
rohe vnd frech zu lieffen / darnach vol wurden / vnd
speyeten vnd spieleten vnd sich schlugen / wie des
schendlichen misbrauchs alle dörffer vol waren / Vnd
noch weder gebüßet noch gebessert / noch fur sünde
erkand wird / bey den verzweuelten Papsst eseln /
Doch ist er nichts / gegen dem schönen misbrauch /
da sie das Sacrament verkeret vnd geendert / vnd aus
dem gemeinen Sacrament des gemeinen glaubens /
ein eigen werck vnd opffer etlicher person / als der
Pfaffen / gemacht haben. Das ist so gar erschrecklich /
das ich nicht gern dran gedencke / Es möchten einen
die gedancken wol tödten / Noch ist das vber diesen
grewel / das sie die wort des Sacraments vnd den
glauben / verborgen vnd verschwigen haben / das
(wie gesagt) nicht ein buchstabe / nicht ein pünctlin
dauon ist vber blieben / im gantzen Papsstumb / inn
allen Messen vnd büchern / Dis laster vbertrifft alle
wort

5.
J. 2.
abel
Me
Sich
N.



wort vnd gedancken/ Das kan niemand inn ewigkeit
gnug schelten odder straffen/ Andere laster/hat ein ig/
lichs seinen eigen teufel/odder hauffen teufel/die es
treiben/Aber die opffer Messe/halt ich/sey ein gemein
werck aller teufel/da sie alle hende/allen rat/alle ge/
dancken/alle bosheit vnd alle schalckheit zu samen ge/
schlagen/vnd diesen grewel gestifft vnd erhalten ha/
ben / Das scheint aus dem / das die polter geister
durch alle welt/inn allen winckeln/als verstorben see/
len/vmb die Messe gebeten haben / Keine seele hat
noch nie begerd oder gefragt nach Christo/alle nach
der Messe. So ist das auch ein starck zeichen / das die
teufel nirgent so gewaltig leben / als inn jren Messe
Knechten/mit aller vnzucht/geitz/lesterung vnd allen
lastern auff's aller schendlichst / Vnd wird freilich der
gröffest vnd letzter zorn Gottes sein auff erden fur
dem Jüngsten tage / Denn es kan kein gröffer zorn
sein. Da hastu die rechte tugent des Papstumbs/da/
fur du solt kriegen vnd dein blut vergiessen/fur die ver/
stockten lesterer/seelmörder vnd bösewichter.

Ob hie jemand wird sagen/Ich werffe zu fast mit
buben vmb mich / Könne nicht mehr / denn buben
vnd schelten/Dem sey erstlich also geantwortet/das
solch schelten / gegen die vnaussprechliche bosheit/
nichts ist / Denn was ist's fur ein schelten / wenn ich
den Teufel einen mörder/bösewicht/verrether/leste/
rer/lügener schelte? Es ist eben/als wehet in ein lufft/
lin an/Was sind aber die Papst esel/denn lauter Teu/
fel leibhafftig/die keine busse/sondern eitel verstockte
hertzen haben/vnd solche öffentliche lesterung wis/
sentlich verteydingen vnd schutz darinn vom Kaiser
vnd

vnd von dir begeren / Lieber schilt vnd nenne einen
Bapst esel / wie du wilt odder kanst / so ist als pfiffe
in eine gans an / Er hatts also vber macht / das er deis
nem schelten viel / viel / viel mal zu gros worden ist /
Nenne in einen Papisten / so rürestu es gar / vnd hast
mehr gesagt / denn die wellt begreiffen kan / Erger
kanstu in nicht schelten / Das ander ist / als stechestu
einen bern mit einem strohalm / odder schlugest mit
einer feddern auff einen felsen.

Zum andern / sey das mein antwort / Das mich die
zween Cardinel / Campegius vnd Saltzburg / ver-
manet vnd geheissen haben / solchs zu thun / damit /
das der eine sagt / Er wolle sich ehe zu reissen lassen / *Compius*
ehe er die Messe wolt lassen endern odder abthun. So
sagt der ander / Pfaffen sind nicht gut / man solle sie *Matthois lang*
vngereformiert lassen. Diese zween aber sind von den
furnemesten / Vnd wie sie reden vnd gleben / so redet
vnd gleubet freilich der Bapst mit allen Papisten.
Weil sie denn selber sagen / das sie verzweuelte böse-
wichter sind / vnd wollen bösewichter bleiben / vnd
sich ehe zureissen lassen / ehe sie von Gottes lesterungen
wollen abstehen / So thet ich in fur Gott vnd fur der
welt vnrecht / wo ich sie anders / denn mit irem eigen
namen / den sie in selbst geben / nennete. Solt ich sie
nu nennen / Erwidigesten / heilige Veter inn Christo /
So würde sie niemand kennen / vnd wüsten sie selbs
nicht / von wem ich redete / weil sie solcher namen nicht
kennen / Sondern verstockte bösewichter vnd lesterer
sind vnd bleiben / Darumb ist mein schelten kein schel-
ten / sondern eben / als wenn ich eine ruben / ruben /
epffel / epffel / birn / birn nennete.

¶ Item /

Sancti
Maria

Item/Wo wiltu die gewulichen abgöttereien tra-
gen/da sie nicht gnung dran gehabt / die heiligen zu
ehren/vnd Gott inn in loben/Sondern eitel Götter
draus gemacht haben/Vnd das edle kind die Mutter
Maria schlecht an Christus stat gesetzt / vnd Chri-
stum zum Richter ertichtet/vnd den elenden gewissen/
einen Tyrannen furgebildet/das alle zuuersicht vnd
trost von Christo genommen/vnd auff Maria gewen-
det ist / darnach ein iglicher zu seinem heiligem von
Christo sich gewendet hat/Kan dis jemand leugnen?
Ists nicht war? Daben wirs nicht allzumal versucht
vnd erfahren/leider? Sind nicht/sonderlich der sche-
bichten Barfusser vnd Prediger Münch bücher für
handen / solcher abgötterey durch aus vol / als die
Marialia/Stellaria/Rosaria/Coronaria vnd gantz
eitel Diabolaria vnd Satanaria? Noch ist hie kein
büßen / noch bessern/Sondern mit dem kopff hin-
durch vnd verstockt/solchs alles vertheydingt vnd dein
leib vnd leben zum schutz gefoddert.

Jch mus hie anzeigen ein stück vom Reichstage
zu Augspurg / auff das man sehe / wie köstlichen
grund sie haben / zu solcher heiligen abgötterey / Da
man im Ausschus / diesen artickel / von anruffen der
heiligen handelte/Brachte D. Eck den spruch erfur/
Genesis.48. da Jacob von Ephraim vnd Manasse
spricht / Et inuocetur nomen meum super pueros
istos / Vnd nach vielen worten Magister Philippi/
Er Johann Brentz on gefehr sprach / Man fünde
nichts inn der schrift/von der heiligen anruffen/Da
fur D. Cochleus herfur/der sachen zu helffen/als ein
tleff bedachter man/vnd sprach / Das man im alten
Testam

Testament die heiligen nicht angeruffen hette / were
die ursache / das die heiligen dazumal noch nicht im
himmel / sondern inn der vorburg der hellen gewesen we-
ren / Da rücket mein gnediger Herr Hertzog Jo-
hans Friderich Hertzog zu Sachsen ꝛc. die schlins-
gen zu vber sie beide / vnd sprach zu D. Eck / Da habt
ir D. Eck ewern spruch verantwortet / den ir aus dem
alten Testament erfur gebracht habt / Also gewis
sind sie irer sachen / So sein stimmen sie mit einander /
die köstlichen schreiber Antilogiarum / Einer spricht /
Im alten Testament hat man die heiligen nicht an-
geruffen / Der ander sagt ja / vnd füren sprüche aus
dem alten Testament / Gerade / als wüste man nicht /
das Gott vmb Abrahams / Isaacs vnd Jacobs wil-
len / alle grosse wunder gethan hat / so im alten Testa-
ment geschehen sind / wie er selbs offt bekennet / Vnd
vmb keines heiligen willen im newen Testament / die
helfft / ja das zehende teil so viel gethan. Wie die nar-
ren / was in ins maul fellet / speyen sie flugs heraus /
Noch mus recht vnd grund der artickel des glaubens
sein / vnd alles vngebüßet vnd dazu verteydingt / die
leute drüber verdampt vnd erwürgt / Dafür soltu krie-
gen vnd streiten ꝛc.

Vnd das wir auch ein mal ein Exempel sagen /
inn solcher langer predigt / wil ich aus so viel tausent
Exempeln jtz das erzelen / das inn einem Morial ste-
het / wie man sol die Jungfraw Maria ehren mit
opffern. Es war ein Ströter odder strassen reuber /
der thet sein gantzes leben nichts guts / on das er eins
mals on gefehr inn eine kirchen kam / auff vnser fra-
wen Liecht messe / vnd sahe / wie die leute pfennige
G ij vnd

5.
Hertzog
Johans friderich

32
bel
Me
Bih
N

ich
ich
ich

Exm

Es wird ein
Creutz ge-
weft. sein.

vnd kertzen auff den altar opfferten / Da opfferte er
auch also / Darnach ward er gegriffen vnd erhencet /
Da wolten die teufel seine seele zur hellen füren / Aber
ein guter Engel widerstund in / vnd sprache / War-
umb füret jr Teufel den weg / so jr doch nichts an jm
habt? Sie antworten / Er hat viel böses vnd nie kein
guts gethan / Da zogen sie mit einander fur Gottes
gericht / Die teufel verklagten den Ströter / das er kein
guts gethan / Aber der gute Engel bracht jersur den
pfennig mit dem Creutz gepregt / sampt der kertzen
auff den altar geopffert / Da gab der Richter das
vrteil / Der Ströter solt sich wehren widder die teufel /
Vnd der Engel gab jm den rat / Er solt den pfennig
inn die lincke hand fassen / fur einen Schilt / vnd die
kertzen inn die rechte hand / fur ein schwerd odder
spies / vnd widder die teufel streiten / vnd eitel Creutz-
schlege thun / Das thet er / vnd vertreib die teufel /
Da kam die seele widder zum leibe / vnd ward vom
galgen genomen / vnd bracht sein leben wol zu /
Dec ille.

Wer kunds erdencken / wenns nicht war were?
Solcher schendlicher lügen fabel / haben die Mönch
vnd Pfaffen so viel bücher vol geklickt / das sie die
Christenheit / wie mit einer sindflut / vberschüt haben /
Noch hat hie kein Bast / Bisschoff / Doctor des al-
les ihe geacht noch gewar worden / Aber nu man pre-
digt / das Christus vnser Heiland sey / werden sie toll
vnd vnfinnig / Da man aber predigte / das eine kertze
vnd creutzer / vnser lieben frawen geopffert / künde ei-
nen vnbusfertigen schalck vnd mörder / on Christo /
on glauben / erretten vnd alle teufel veriagen / vnd
Christus

Christus leiden vnd leben / lesterte vnd verdrückte / da
waren alle predigt gut vnd köstlich / Da waren keine
Ketzer / Aber es gehöret alles dahin / Pfaffen sind nie
gut geweest.

Item / wie wil auch dein gewissen tragen / die gro-
sse plage / marter vnd gewalt / die sie aller wellt haben
angethan / mit irer angst beicht / da mit sie so viel see-
len verzweiuelt gemacht / vnd allen Christlichen trost /
den elenden gewissen geraubt vnd gewehret haben /
Da sie die krafft der Absolution / vnd den glauben / so
verretherisch vnd boshafftig / verborgen vnd geschwi-
gen / allein gedrungen auff die vnleidliche marter vnd
vnmügliche arbeit / die sunden zu erzelen vnd zu bere-
wen / Daben solchem rewen vnd erzelen / als vnserm
eigen werck / verheissen die gnade vnd seligkeit / damit
von Christo auff vns selbst geweisset vnd behalten /
Summa / Es ist doch alles / was sie leren vnd thun /
dahin gericht / das sie vns von Christo / auff ir vnd
vnser werck führen / Vnd ist kein buchstabe so klein inn
irer lere / vnd kein wercklin so geringe / es verleugnet
vnd lestert Christum / vnd schendet den glauben an
in / vnd füret die armen hertzen auff vnmüglich ding
vnd zu verzweiueln / Vnd so solte auch der rechte
Widder Christ thun / das er seinem namen nach /
reichlich gnug / widder Christum lerete vnd lebete /
Vnd sich selbs vber Gott vnd sein wort erhübe / Das
sehen wir im Papstumb stercker erfüllet / denn man
begreiffen kan / Noch ist solchs alles vngedüßset / ver-
teydingen solehe beicht noch heutiges tages / wollen
auch / das du solche marter / hertzeleid / verzweiueln /
vnd alle plage dieser beicht solt helfen erstreiten / vnd

G iij aller see

Absolutio

*32
bel
Me
Sicht
v*

aller seelen jammer auff dich laden.

*Ban
Claves*

Item/Du must auff dich laden / den leidigen jammer vnd verfluchten misbrauch des Bannes vnd der Schlüssel / Welcher misbrauch allein gnugsam verdienet hette / das man das Papstum zu grund liesse gehen / schweige denn / das man dafur streiten solt / den selbigen zu bestettigen vnd stercken / Wie hat der Papst hiemit getobet vnd gewütet / widder Keiser / Könige vnd alle welt? Ja widder Gott selbs vnd sein heiliges wort / Was im nur der Teufel hat ins hertz gegeben / das hat müssen recht vnd gut sein / Wie viel Kriegs vnd bluts hat er damit angericht inn aller welt. Vnd wer kan allen greuel erzelen? Was er hat wollen / fur sünde haben / das hat müssen sünde heissen vnd sein / Was er hat wollen heilig haben / das hat müssen heilig sein / Diemit ist er ein schrecklicher herr gewesen / vber die gantzen welt / vber leib / seele / gut / land vnd leute / vber Fegfeur / vber Helle / vber Teufel / vber himel / vber Engel / vber Gott vnd alles / Wem er hat gewolt / dem ist der himel offen vnd verschlossen / Die helle / zu vnd auff gethan gewest / Wem er hat gewolt / dem ist sein leib / gut / ehre / land / reich / weib / kind / haus / hoff / gelt vnd alles / genommen odder blieben / Vnd was were das Papstum / wo der Schlüssel missebrauch nicht were?

Nu haben sie solches alles gethan / aus lauter mutwillen / da sie kein recht zu hatten / vmb ires bawchs vnd herrschafft willen / Vnd das noch das aller ergeste ist / Gottes namen haben sie dazu auff alle schendlichst missebraucht / Denn vnter Gottes
namen

namen haben sie alle solche vnaußsprechliche greuel/
wüten vnd toben/getrieben/Dafür sie doch nicht ein
einigen gedancken hetten/das sie es bessern wolten/
sondern/wie die harten ambos/verstockt/lassen sie
auff sich schlagen/vnd bleiben auff solchem fursatz
fest/wollen alles noch dazu/durch dein blut vnd
schutz/verteydigt vñ gesterckt haben/Es were nicht
wunder/das himel vnd erden zurisse vnd zubürste/
vber solcher verzweinelter/trotziger bosheit/Vnd das
Gott solche vnableßliche bosheit/solchen trotz/vnd
missethaten so lange leidet. Ich halte/Wenn der Tür-
cke wüste/das er so vnrecht were/wie die Papisten
wissen/das sie solche verzweinelte bösewichter sind/
Er würde nicht so verstockt sein/vnd Gott/mit seiner
bosheit/nicht so frechlich trotzen/Denn ich halt/
das der Türck nicht reden würde/nemlich/Wir Tür-
cken sind nie gut gewesen/wie vnser Papisten reden/
Wir Pfaffen sind nie gut gewesen. Vnd kurtz/das thut
allein der Teufel/derselbig weis auch/das er böse ist/
vnd wil seine bosheit dazu verteydingen/Dem selbi-
gen nach thut das Papstum/das erkennet solche sei-
ne grewliche bosheit/vnd wil sie vngebessert/dazu be-
stettigt/vnd durch dein leib vnd blut verteydingt ha-
ben. Hastu nu lust zu streiten/Die findestu eine red-
liche vrsache/für die aller heiligsten vnd geistlichsten
lente/Aber bedencke nur das hundert tausent teil sol-
cher bosheit/der du dich teilhafftig machen würdest/
so wird dir die lust solchs streites wol vergehen/vnd
wirst sagen/Ich liesse solche vnbusfertige ertzböse-
wichter das hellische feur haben/im abgrund der hel-
len/ehe ich wolt einen faden regen vmb iren willen/
schweige/das ich mein leib vnd leben für sie wogen
solt.

Item/

Item / Du must auff dich laden vnd helffen stercken / das verferliche / lügenhafftige / schendliche narren spiel des Teufels / das sie mit dem heiligthum vnd walfarten getrieben haben / vnd noch keines wegcs gedenccken zu büßen / **N**ilff Gott / wie hat es hie geschneiet vnd geregent / ja eitel wolckenbrust gefallen / mit lügen vnd bescheifferey / Wie hat der Teufel hie / todte knochen / Kleider vnd gerete / fur der heiligen beine vnd gerete auff gemutzt / wie sicher hat man allen lügen meulern gegleubt? Wie ist man gelauffen zu den walfarten / Welchs alles der Paps / Bischo / ue / Pfaffen / Mönche haben bestettigt / odder ihe zum wenigsten geschwigen / vnd die leute lassen irren / vnd das geld vnd gut genomen / Was thet allein die newe bescheifferey zu Trier / mit Christus rock? Was hat hie der Teufel grossen jarmarckt gehalten inn aller welt / vnd so vnzeliche falsche wunderzeichen verkaufft? Ach / was ist / das jemand hie von reden mag? Wenn alles laub vnd gras zungen weren / sie köndten allein dis buben stück nicht aus sprechen / Noch müssen wir zusehen / das sie es nicht bekennen noch büßen / sondern erhalten / stercken vnd bessern wollen / dazu durch dein leib vnd blut.

Vnd das noch das aller ergest ist / Das sie die leute hie mit verführet vnd von Christo gezogen haben / auff solche lügen zu trawen vnd bawen / Denn es ist keiner dem heiligthumb odder walfart nach gelauffen / Er hat seine zuuersicht vnd trost darauff gesetzt / vnd seinen Christum / daheim / das Euan gelion vnd glauben / dazu seinen stand / dagegen verachten / vnd als fur nichts halten / müssen. **Aber**
die Pa

die Papisten/haben solcher verführung der seelen/solche verleugnung vnd verachtung Christi vnd seines glaubens/nicht allein nicht geweret/sondern lust vnd freude dran gehabt/vnd mit Ablass vnd gnaden gezieret vnd gesterckt/vnd sich gar wol damit geweidet/alle welt geschunden vnd geschaben / Noch ist da kein bessern odder büßen/Sondern eitel trotziger fursatz/solchs alles zu mehren vnd stercken/vnd schlecht keine newerung zu leiden. Die höret her das gülden jar/so die ertzlügenere die Bepste ertichtet haben/auch den Engeln geboten/der pilger seelen gen himel zu führen. Aber/Es ist alles vnd alles zu hoch vnd zu viel/vber alles reden vnd gedencken. Es heisst/Abominatio in loco sancto/Grewel inn der heiligen stete/So hat Christus das Bapstum genennet/mit einfeltigem/aber doch vnbegreiflichem wort.

Ich meine ja/das Bapstum sey ein gewel/nicht allein mit solchen bösen stücken/Sondern auch mit vnbusfertigkeit / das es solche stücke nicht bessern/sondern vertheydingt haben wil / Vnd sündigt also nicht allein/mit der that an jr selbs/Sondern bestetigt solche sünde mit vnbusfertigkeit/das ist/mit sünden inn den heiligen geist / das nicht höher komen/noch erger werden kan / Denn der Teufel selbs nicht höher noch erger sündigen kan/ Sihe/das sind die gesellen / die vber Gottes wort Richter sein wollen/die dürffen vns anmuten/das wir vnser lere sollen wider ruffen vnd büßen. Item / das wir alle solche gewel sollen anbeten/fur Gottes wort vnd werck/Sie wollen vngereformirt sein/vnd kurtz vmb keine newerung leiden. **D** heisst

heißt denn auffrur erwecken? Weisst das nicht pesti-
lantz/theur zeit/Türcken/Krieg/mord/vnd allen Got-
tes zorn vnd plage erregen / was ist denn so böse jmer
mehr/das erregen müge? Aber ich mus hie auffhö-
ren der grewel/so noch viel dahinden sind / mehr zu
rüren / Als da sind die bruderschafften / gelübde zun
heiligen/vnd der grosse jarmarckt/da die Pfaffen vnd
Münche aller welt ire gute werck vnd kappen ver-
kaufften/vnd im sterben damit kleideten/vnd gen hi-
mel füreten/Es möchten sonst einem alle sinnen da-
fur geschwinden vnd vergehen/Es ist leider allzu viel
an einem halben teil/eines einigen stücks.

ista causa

Die dritte vrsache/das du dem Keiser inn solchem
auffbot nicht solt gehorsam sein/ist / das du nicht al-
lein solche grewel must auff dich laden vnd helffen
stercken/sondern must auch helffen störtzen vnd aus-
rotten alle das gut/so durch das liebe Euangelion ist
widder auffbracht vnd angericht / Denn die böse-
wichter wollen nicht gnug daran haben/das sie sol-
che teußeley vnd grewel erhalten / dazu (wie sie im
Edict gebieten) keine newerung dulden / Sondern
ausrotten vnd gantz vertilgen / alles/was wir ihe ge-
leret/gelebt vnd gethan haben/vnd noch thun vnd
leben. Diese vrsachen begreiffst auch viel inn sich/
Denn vnser Euangelion hat/Gott lob/viel grosses
gutes geschafft. Es hat zuvor niemand gewust/was
das Euangelion/Was Christus/Was Tauffe/Was
Beichte/Was Sacrament/Was der Glaube/Was
Geist/Was Fleisch / Was gute werck / Was die Ze-
hengebot/Was Vater vnser/Was beten/Was leiden/
Was trost/Was weltliche oberkeit/Was Ehestand/
Was el

Was eltern/Was kinder/Was herrn/Was knecht/
Was frau/Was magd/Was Teufel/Was Engel/
Was welt/Was leben/Was tod/Was sünde/Was
recht/Was vergebung der sünden/Was Gott/Was
Bischoff/Was Pfarher/Was Kirche/Was ein
Christ/Was Creutz/sey. Summa/Wir haben gar
nichts gewußt/was ein Christ wissen sol/Alles ist
durch die Bapst esel vertunckelt vnd vnterdruckt/Es
sind ja Esel/vnd grosse/grobe/vngelerete Esel/in
Christlichen sachen/Denn ich bin auch einer gewesen/
vnd weis/das ich hierinn die warheit sage/Vnd wer-
den mir des zeugen alle frumen hertzen/die vnter dem
Bapst/so wol als ich/ gefangen/ gern solcher stück
eins hetten gewußt/vnd habens nicht wissen können
noch müssen/Wir wußten nicht anders/denn Pfaf-
fen vnd Mönche weren alles gar alleine/vnd auff
iren wercken stunden wir/vnd nicht auff Christo.

Aber nu ist/ Gott lob/dahin komen/das man
vnd weib/jung vnd alt/den Catechismum weis/Vnd
wie man glauben/leben/beten/leiden/vnd sterben
sol/Vnd ist ja eine schöne vnterricht der gewissen/
wie man sol Christen sein vnd Christum erkennen/
Man predigt doch nu von glauben vnd guten wer-
cken recht/Vnd summa/die obgenanten stück sind
widder ans liecht komen/vnd predigstule/altar vnd
tauffstein widder zu recht bracht/Das/Gott lob/
widderumb einer Christlichen Kirchen gestalt zu er-
kennen ist. Solchs alles mustu aber helffen ausrot-
ten vnd vertilgen/wo du fur die Papisten kriegest/
Denn sie wollen der stück/von vns geleret vnd ange-
richt/keines nicht leiden/Sondern (wie sie sagen)
N ij das pos

das possessorium haben/widder inn die alten gewehr
sitzen/vnd gar keine newerung dulden. Da mustu
helffen alle Deudsche bücher/new Testament/Psal-
ter/bettbüchlin/gesang büchlin/vnd alles/was wir
von vielen guten dingen geschriben haben/das sie
selber bekennen/verbrennen / Du must helffen / das
niemand die Zehen gebot / das Vater vnser / den
Glauben / wisse (Denn so ist vorhin gewesen) Du
must helffen/das niemand von der Tauffe / Sacra-
ment / Glauben / Oberkeit / Ehestand / noch vom
Euangelio etwas lerne / Du must helffen / das nie-
mand die Christlichen freiheit kenne / Du must hel-
ffen / das niemand auff Christum sein trawen vnd
trost setze/Denn solches alles ist vorhin nicht gewesen/
vnd ist eitel newerung.

Item / Du must helffen / das vnser Pfarherrn
vnd Prediger kinder/arme verlassene waislin als hur-
kinder verdampt vnd geschendet/werden / Du must
helffen / das man widderumb an Christus stat / auff
der Münche vnd Pfaffen werck sich verlasse / vnd ir
verdienst vnd kappen im sterben / kenne / Du must
helffen/das sie an stat der ehe / widderumb die Chri-
stenheit füllen/mit hurerey/ehebruch vnd andern vn-
natürlichen schendlichen lastern. Du must den gewö-
lichen jar marckt der opffer Messen helffen widder
anrichten / Du must alle iren geitz / raub / diebstal/
damit sie ire güter bekommen / helffen vertheydingen.
Vnd was sol ich viel erzelen? Du must helffen/Chri-
stus wort vnd gantzes Reich / verstören / vnd dem
Teufel sein Reich widder barwen / Denn da wollen
die bösewichter hin/die auff possessorium odder auff
die ar-

die alten gewehr dringen. Sie sind des Ende Christs
odder Widder Christs / Darumb können sie nichts
anders thun/denn das widder Christum ist/sonder-
lich inn dem heubt Artickel / Das vnser hertz seinen
trost vnd zuuersicht/nicht auff vnser werck/sondern
allein auff Christo setzen sol/das ist/allein durch den
glauben von sunden frey / vnd gerecht werden / wie
geschrieben stehet/Rom.10. Mit dem hertzen gleybt
man/so wird man gerecht.

Diesen Artickel (sage ich) wollen sie schlecht
nicht leiden / So können wir sein nicht geraten /
Denn wo der Artickel weg ist/so ist die Kirche weg/
vnd mag keinem irthumb widderstanden werden/
weil ausser diesem Artickel/der heilige geist/nicht bey
vns sein wil noch kan/Denn er sol vns Christum ver-
kieren. Vber diesem Artickel ist die welt so offft zu
scheitern gangen/durch Sindflut/wetter/gewesser/
Krieg vnd alle plagen/Vber diesem Artickel ist Dabel
erwürgt vnd alle heiligen/vnd müssen auch alle Chri-
sten drüber sterben/Dennoch ist er blieben vnd mus
bleiben/Vnd die welt jmerdar drüber zu grund ge-
hen/Also sol sie jtz auch herhalten / vnd vber dem
Artickel gestörtzt werden/Vnd solt sie toll vnd töricht
werden/so sol sie den Artikel lassen stehen/vnd sie drü-
ber inn der hellen grund fallen/Amen. Nu bedencck
vnd besihe dich eben / Soltu widder Gott vnd sein
wort/vnd alles was Gottes ist / streiten / Soltu alle
grewel des Bapstumbs / vnd alle das vnschuldige
blut/so von Dabel her vergossen ist/auff dich laden/
Soltu alle das gut helffen ansrotten/so vns durchs
Euangelion widderfaren ist / vnd endlich Christus
D iij Reich

5.
Glaub
wird
gott

2.2
abel
Me
Licht
N

Reich verstoren vnd des Teufels Reich bauen / So
sibe zu/was du fur sieg erlangen werdest / vnd mit
waserley gewissen du dem Keiserlichen auffbot ge-
horsam seiest.

Ist dir nu zu raten / So hastu hierinn warnung
gnug/das du dem Keiser vnd deinem Fürsten nicht
solt gehorsam sein/inn solchem fall / wie die Apostel
sagen/ Man mus Gotte mehr gehorsam sein/denn
den menschen/Wiltu folgen/ist gut / Wiltu nicht/so
lasse es/vnd fare jmer hin/vnd streite getrost / Chri-
stus wird sich fur dir nicht furchten / vnd wird) ob
Gott wil) auch fur dir bleiben. Bleibt er aber / so sol
er dir streitens gnug geben/Wir wollen die weil zu se-
hen/welcher den andern vberpochen / vnd das feld
behalten werde.

Dis wil ich meinen Lieben Deudschen zur war-
nung gesagt haben/Vnd wie droben / also bezeuge
ich hie auch / das ich nicht zu Krieg / noch auffrur/
noch gegenwehre wil jemand hetzen odder reitzen/
Sondern allein zum friede / Wo aber vnser Teufel/
die Papisten/nicht wollen friede halten/sondern mit
solchen verstockten greweln/vngebüßet/widder den
Heiligen geist rasend/dennoch kriegen / vnd drüber
blutige köpffe dauon bringen / odder gar zu boden
gehen würden / wil ich hie mit öffentlich bezen-
get haben / das ich solchs nicht gethan / noch vr-
sache dazu gegeben habe / Sondern sie wollens so
haben/ir blut sey auff irem kopff / Ich bin entschül-
digt / vnd hab das meine auff's aller trewlichst ge-
than / Dinsfurt las ich den richten / der richten wil/
sol vnd

sol vnd auch kan / der wird nicht seumen vnd auch
nicht feilen / Dem sey lob vnd ehre /
danck vnd preis inn ewigkeit /
A M E N.

Bedruckt zu Wittenberg
Durch Hans Lufft.
M. D. XXXI.

Faint, illegible text at the top of the page, possibly bleed-through from the reverse side.

Faint, illegible text in the middle of the page, possibly bleed-through from the reverse side.

2
2
2

Decorative border on the right edge of the page, featuring intricate scrollwork and floral patterns.



Jb-3676^a

ULB Halle 3
003 704 98X



PA 502







Abb. 4^a (14)

5.

g. 2
bel
M
Bibl
Nr

Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19

Farbkarte #13 **B.I.G.**

Blue	Cyan	Green	Yellow	Red	Magenta	White	3/Color	Black

